



盛京通志卷之第二十二

帝王

后妃

自古地靈者必推人傑謂地以人重也矧膺  
天命居天位者哉故毓聖所自湯沐垂光定鼎  
攸基京華建極尚矣自臨潢以金箭造邦長白  
以慶雲啓瑞遼金二祖發祥斯地肇創神畿乾  
元統運既以寶曆相承坤德呈祥亦遂母儀媿  
美史冊專詳志亦未敢畧也作帝王志

遼

太祖



姓耶律氏名億字阿保機小字啜里只契丹  
迭刺部霞瀨益石烈耶律彌里人德祖皇帝  
長子唐咸通十三年生痕德堇可汗拜太祖  
於越總知軍國事遺命立太祖以後梁開平  
元年羣臣上尊號曰天皇帝神册三年城皇  
都後太宗更名上京在位二十年五十五  
廟號太祖重熙二十一年加謚大聖大明神  
烈天皇帝。按地里志上京本漢遼東郡西  
安平之地

### 太宗

名德光字德謹小字堯骨太祖第二子天贊  
元年授天下兵馬大元帥天顯元年即皇帝  
位十一年册石敬瑭為大晉皇帝會同元年  
哥以十六州來獻九年南伐降晉帝重貴為  
負義侯。元年建國號大遼在位二十二  
年年四十年。太宗重熙中增謚孝武惠  
文皇帝。天顯二年陞東平郡為南  
京十三年又改為東京即今遼陽也

### 世宗

名阮小字欲讓國皇帝長子會同九年從  
太宗伐。在位五年年三十四廟號世宗統  
和中加謚孝  
和莊憲皇帝

### 穆宗

名璟小字述律太宗皇帝長子會同二年封  
壽安王在位十八年年二十九廟號穆宗重  
熙中謚曰孝  
安敬正皇帝

### 景宗

名賢字賢寧小字明辰世宗皇帝第二子在  
位十三年年三十五廟號景宗重熙中加謚  
孝成康  
靖皇帝

### 聖宗

名隆緒小字文姝奴景宗皇帝長子初封梁王卽帝位二十五年建中京在位四十九年六十一景福元年上尊謚曰文武大孝宣皇帝廟號聖宗○按地理志中京秦爲遼西漢新安平地聖宗見七金山雲氣有樓閣狀因建都

### 興宗

名宗真字夷不董小字只骨聖宗長子太平元年册爲皇太子在位二十四年清寧元年上尊謚爲神聖孝章皇帝廟號興宗

### 道宗

名洪基字涅鄰小字查刺興宗長子六歲封梁王進封燕趙國王爲天下兵馬大元帥在位四十七年謚仁聖大孝文皇帝廟號道宗

### 天祚

名延禧字延寧小字阿果道宗之孫昭懷太子之子六歲封梁王進封燕國王爲天下兵馬大元帥壽隆七年奉遺詔卽皇帝位羣臣上尊號曰天祚皇帝在位二十四年金兵至爲完顏婁室所獲封海濱王年五十有四耶律淳自立爲北遼耶律大石自立爲西遼皆在天祚之世以僭號故不錄

## 金

### 太祖

始祖居完顏部僕幹水之涯生德帝德帝子安帝安帝子獻祖始定居安出虎水之側獻祖子昭祖遼以惕隱官之昭祖子景祖遼以爲節度使景祖子世祖襲節度使弟肅宗繼之肅宗弟穆宗繼之穆宗後傳世祖長子康宗太祖名旻本名阿骨打世祖第二子遼道宗時有五色雲屢出東方司天孔致和言其下當生異人建非常之事遼藏叛人屢請不

遣乃會諸路兵攻遼敗遼軍於咸州收國元年羣臣上尊號卽皇帝位國號大金收元四年克上京六年取中京燕京在位九年五十六謚武元皇帝廟號太祖皇統中增謚應乾興運昭德定功睿神莊孝仁明大聖武元皇帝

### 太宗

名晟本名吳乞買世祖第四子太祖母弟也為諸班勃極烈太祖征伐常居守天輔七年召赴行在卽皇帝位以海古地為京師天會三年完顏婁室獲遼主於余睹谷詔諸將伐宋四年宗弼宗望等入汴宋太上皇出奔宋主桓降在位十三年六十一廟號太宗皇統五年增謚曰體元應運世德昭功哲惠仁聖文烈皇帝

### 熙宗

名亶本名合刺太祖孫初為諸班勃極烈在位十二年三十一其後增謚弘基續武莊靖孝成皇帝廟號熙宗以海古地為上京。在今寧古塔

### 廢帝海陵

名亮字元功本名迪古乃遼王宗幹第二子初為平章政事忽土阿里出虎等立之貞元元年遷都燕京為中都削上京在位十三年四十大定二年降封海陵郡王謚曰煬後廢為庶人

### 世宗

名雍本名烏祿太祖孫睿宗子也封曹國公留守東京海陵南伐人心歸之遂卽皇帝位於遼陽大定十三年復上京時南北講好與民休息舉賢求言上下相安家給人足號稱小堯舜在位二十九年六十七謚光天興運文德武功聖明仁孝皇帝廟號世宗

### 章宗

名璟小字麻達葛世宗嫡孫二十六年立為  
皇太孫在位二十年四十一謚憲天光運  
仁文義武神聖英  
孝皇帝廟號章宗

### 衛紹王

名永濟小字興勝更名允濟封衛王章宗遺  
詔立之在位四年胡沙虎為亂追降東海郡  
侯立宣宗貞祐四年  
詔追復衛王謚曰紹

### 宣宗

名珣本名吾睹補章宗庶兄封昇王判永定  
彰德等軍徒單銘等迎立之元兵逼遷都南  
京在位十一年六十一謚曰繼天興  
統述道勤仁英武聖孝皇帝廟號宣宗

### 哀宗

名守緒初名守禮又名寧甲速宣宗第二子  
貞祐四年立為皇太子賜名守緒在位十年

元兵逼傳位於元帥承麟是為末帝

### 后妃

## 遼

### 太祖淳欽皇后

述律氏名平小字月理朶太祖即位羣臣上  
尊號曰地皇后行兵御衆后嘗與謀太宗即  
位於鎮陽后怒親率師逆擊賴耶律屋質諫  
罷兵尊為皇太后遷祖州會同初上尊號曰  
廣德至仁昭烈崇簡應天太  
后謚貞烈重熙中更今謚

### 太宗靖安皇后

蕭氏小字温淳欽皇后弟室魯之女帝為大  
元帥納為妃生穆宗及即位立為皇后謚彰  
德重熙中更謚○按蕭氏即乙室括里氏太  
祖慕漢高帝故耶律儼稱劉氏以乙室拔里

比蕭相國遂為蕭氏太祖以上追尊德祖元祖懿祖肅祖諸后皆蕭氏世任其國事云

### 世宗懷節皇后

蕭氏小字撒葛只淳欽皇后弟阿古只之女帝為永康王納之天祿末立為皇后謚曰孝烈皇后重熙中更謚

### 世宗妃

甄氏後唐宮人太宗南征得之即位立為皇后與參帷幄密謀景宗立葬二后醫巫間山

### 穆宗皇后

蕭氏父知璠內供奉翰林承旨帝居藩納為妃及正位中宮無子

### 景宗睿智皇后

蕭氏名綽小字燕燕北府宰相思溫女帝即位選為貴妃尋冊為皇后生聖宗聖宗立尊為皇太后攝國政累上尊號曰睿德神畧應運啓化承天皇后聖宗稱遼盛主后教訓為多謚曰聖神宣獻皇后重熙中更今謚

### 聖宗仁德皇后

蕭氏小字菩薩哥睿智皇后弟隗因之女選入掖庭統和十九年冊為齊天皇后生皇子早卒宮人稱斤生與宗后養為子與宗立稱斤自立為皇太后遷后於上京年五十追尊仁德皇后

### 聖宗欽哀皇后

蕭氏小字稱斤淳欽皇后弟阿古只五世孫入宮生與宗與宗即位自立為皇太后重熙元年尊為仁慈聖善欽孝廣德安靖貞純寬厚崇覺儀天皇太后清寧初尊為太皇太后謚曰欽哀

興宗仁懿皇后

蕭氏小字撻里欽哀皇后弟孝穆之長女帝即位入宮生道宗立為皇后號貞懿景和文惠孝敬廣愛崇聖皇后道宗即位尊為皇太后清寧二年上尊號曰慈懿仁和文惠孝敬廣愛宗天皇太后仁慈淑謹中外感德謚仁懿皇后

興宗貴妃

蕭氏小字三嬪駙馬都尉匹里之女選入東宮帝即位立為后重熙初降貴妃

道宗宣懿皇后

蕭氏小字觀音欽哀皇后弟樞密使惠之女重熙中帝王燕趙納為妃清寧初立為懿德皇后宮婢誣奏賜自盡乾統初謚宣懿皇后

道宗惠妃

蕭氏小字坦思駙馬都尉霞抹之妹選入掖庭立為皇后八年降為惠妃尋降為庶人天慶六年封太皇太妃

天祚皇后

蕭氏小字奪里懶宰相繼先五世孫大安三年入宮明年封燕國王妃乾統初冊為皇后從天祚西狩

天祚德妃

蕭氏小字師姑北府宰相常哥之女

天祚文妃

蕭氏小字瑟瑟國舅大父房之女帝幸耶律撻葛第見而悅之三年冬納為妃善歌詩帝不恤國事忠臣多被誅斥妃作歌諷諫元妃兄蕭奉先誣奏之賜死



### 天祚元妃

蕭氏小字貴哥燕國妃之妹年十七册為元妃性寬厚從天祚西狩

### 金

### 太祖聖穆皇后

唐括氏天會十三年追謚○按金始祖明懿皇后年六十餘始嫁始祖生諸帝又德帝思皇后安帝節皇后獻祖恭靖皇后昭祖威順皇后景祖昭肅皇后世祖簡翼皇后肅宗靖宣皇后穆宗貞惠皇后康宗敬禧皇后皆天會中追謚太祖始稱尊故首紀之以上諸后史或闕其族里然槩在長白山混同江左右之地

### 太祖光懿皇后

裴滿氏天會十三年追謚

### 太祖欽憲皇后

紇石烈氏天會十三年尊為太皇太后

### 太祖宣獻皇后

僕散氏睿宗母也天會十三年追册曰德妃大定元年追謚

### 崇妃蕭氏

熙宗時封貴妃天德二年封元妃尊封太妃海陵母大氏事妃甚謹海陵不能平誣以隱惡弑之太定十九年改葬欲追封太妃舊號禮官以太妃者母以子貴不得稱太乃封崇妃

### 太宗欽仁皇后

唐括氏熙宗即位尊為太皇太后謚曰欽仁皇后

### 熙宗悼平皇后

裴滿氏熙宗即位封貴妃天眷元年立為皇后熙宗積怒殺之海陵即位以后死無罪降熙宗東昏王追謚后悼皇后大定間復熙宗帝號加謚后曰悼平皇后

### 海陵嫡母

徒單氏宗幹之正室也徒單無子次室大氏生三子長即海陵天德二年與徒單氏俱尊為皇太后海陵遷中都留徒單於上京大氏臨終謂海陵曰永壽宮待吾母子甚厚必迎致之事永壽宮如事我乃迎至中都海陵南伐太后諫止之不悅遇弒大定間追謚哀皇后後海陵貶為庶人徒單氏降封遼王妃

### 海陵母

大氏天德二年與徒單氏俱尊為皇太后謚曰慈憲皇后大定七年降封海陵太妃及宗

幹降帝號降為遼王夫人

### 廢帝海陵后

徒單氏太師幹也之女初為岐國妃天德二年封惠妃九月立為皇后世宗立后至中都世宗憐其無依詔歸父母家

### 世宗明德皇后

烏林荅氏父石止黑世宗在濟南海陵召后來中都后至良鄉自殺世宗即位大定二年追册為昭德皇后二十餘年不立后章宗時有司奏太祖謚有昭德字改謚明德皇后○世宗即位睿宗升祔追謚睿宗元配蒲察氏曰欽慈皇后追謚母李氏貞懿皇后貞懿后遼陽人

### 元妃

張氏與世宗母貞懿皇后有親世宗納爲次室生趙王永中大定十九年進元妃

### 元妃

李氏南陽郡王李石女生衛紹王大定七年進封元妃衛紹王卽位追謚光獻皇后貞祐三年削皇后號

### 顯宗孝懿皇后

徒單氏其先忒里闡刺人父貞駙馬都尉顯宗爲皇太子納爲妃生章宗章宗卽位尊爲皇太后謚孝懿

### 昭聖皇后

劉氏遼陽人聰慧過目不忘讀孝經旬日終卷世宗爲東京留守見而奇之選入東宮生宣宗承安五年贈昭華宣宗卽位追尊爲皇太后祔顯宗廟追謚昭聖皇后

### 章宗欽懷皇后

蒲察氏上京路人父鼎壽駙馬都尉章宗爲金源郡王封夫人後追封妃卽位追冊爲皇后

### 元妃

李氏師兒其家有罪沒入宮籍章宗愛幸之欲立爲后大臣不從進封爲元妃定策立衛王衛王立完顏匡構之賜死

### 衛紹王后

徒單氏大安元年立爲皇后宣宗卽位削后號徙鄭州

### 宣宗皇后

王氏中都人明惠皇后妹也宣宗封翼王求民家子以廣繼嗣后入王邸及見后姊有姿

色又納之封后爲元妃姊爲淑妃及卽位無子養哀宗爲己子貞祐二年賜姓温敦氏立爲皇后哀宗卽位尊爲皇太后京城破后及諸妃嬪北遷不知所終

### 宣宗明惠皇后

王皇后姊也生哀宗王后立爲后進封元妃哀宗卽位尊爲皇太后性端嚴達古今正大八年謚明惠皇后

### 哀宗皇后

徒單氏宣宗及后有疾后嘗割膚以進正大元年詔立爲皇后城破北遷不知所終

## 皇京通志卷之第二十四

### 名宦

仕宦而惠愛一方則父老子弟從而俎豆之蓋崇德報功意也遼地漢唐以來歷宦者多以武功顯遼金定鼎而定國勤事之臣輩出焉我

朝肇興其任心膂股肱寄者勲在社稷名勒鐘簴矣而畱都之鎮帥卿貳與夫郡邑長吏之循良固將崇祀茲土以風來茲者也則論定所宜慎歟作名宦志

### 周

箕子

紂諸父佯狂為奴紂亾周武王釋其囚封之於朝鮮至則教民禮義田蠶織作其俗化之夜戶不閉嬭人貞信

漢

楊僕

武帝時人為樓船將軍從齊浮渤海出遼東討衛滿孫右渠遂定其地

荀彘

與楊僕同時為左將軍功亦同之

甘延壽

字君况北地郡人少以良家子弟善騎射嘗超距踰羽林亭樓由是遷為郎以材力遷至

遼東太守車騎將軍與陳湯誅郅支有功進封義成侯

祭彤

光武時任遼東太守為人質直厚重撫人以信曾以數千人破鮮卑萬餘騎後没明帝方欲在用聞之大驚民為立祠四時奉祭

范明友

為度遼將軍將二萬騎出遼東擊敵斬首六千餘級獲三王首而還

梁慄

為度遼將軍擊敵破之敵遂乞降後稍親附

陳禪

巴郡人為遼東太守居官說道義以化人後為車騎將軍遷司隸校尉

龐參

緱氏人初舉孝廉拜左校令樊準以為鷲鳥累百不如一鶚薦參為遼東太守遷度遼將軍有功復入為尚書僕射

耿夔

少負氣敢為投車騎將軍遷遼東太守累建功業

陳龜

上黨人家世邊將弓馬雄於北州為度遼將軍州郡震慄敵人不敢近塞歲省經費以億計

公沙穆

膠東人家貧少不好弄長習韓詩公羊春秋尤銳志河洛推步之術居建威山中獨宿時值暴風疾雷有呼穆於戶外者穆不應遂自牖而入狀貌甚怪穆讀書自若終亦無他富人王仲致穆千金穆不受後舉孝廉為主事累遷遼東屬國都尉有惠政卒於官

馮緄

宕渠人少學春秋司馬兵法父煥安帝時為幽州刺史有怨者詐作璽書譴責下遼東都尉使速行刑煥欲自殺緄謂煥曰大人在州志欲去惡實無他故必凶人安作姦毒願以事自明煥從之果詐者所為會煥已歿獄中帝愍之賜錢十萬一子為郎中緄由是知名後為遼東太守拜京兆尹轉司隸校尉遷廷尉太常皆有能聲

李膺

襄城人性簡約無所交接以同郡荀淑陳實為師友桓帝時為度遼將軍所至皆有功

趙苞

其陵人守遼西遣使迎母經柳城值鮮卑入塞劫苞母載以擊郡苞出戰悲號謂母曰為子無狀欲以微祿奉養朝夕不圖為母作禍昔為母子今為王臣義不得顧私恩毀忠節母遙謂曰人各有命何得相顧爾其勉之苞進戰破之母遂被害苞歸葬母訖謂鄉人曰食祿而避難非忠也殺母以全義非孝也如有何面目立於天下遂嘔血死

### 張奐

敦煌酒泉人也自皇甫規薦復遷為度遼將軍邊人多相率降者

### 馬續

度遼將軍典邊日久深曉兵要招降萬三千口

### 公孫瓚

遼西令支人也少為小吏美姿貌大音聲從涿郡盧植學於緱氏山中後舉孝廉除遼東

### 种暠

屬國長史好乘白馬邊人相告語曰避白馬長史威名大震拜奮武將軍

### 皇甫規

洛陽人遼東太守有政聲遷南郡太守入為尚書桓帝時擢為度遼將軍後復入為司農

朝那人舉賢良方正對策梁冀以為刺已下第後舉規為中郎將持節監關西兵兩為度遼將軍多惠政

### 段熲

姑臧人少尚游俠舉孝廉遷遼東屬國都尉所至有功

### 耿晹

順帝時為烏桓校尉後率郡卒破敵威振北方遷度遼將軍

鄧遵

為度遼將軍發射士三千人出塞追敵大破之獲牲畜財物甚眾

鄧鴻

為度遼將軍出朔方並進兵鞬海斬獲無算

劉虞

幽州牧時遼西丘力居遼東蘇僕延稱王中山太守張純叛附之虞購斬純首北州乃定

三國

司馬懿

魏景初間公孫淵自立為燕王魏遣懿征之累戰皆捷進圍襄平起土山射入城中淵窘急突圍而走懿追斬之遼東悉平

凉茂

昌邑人少好學嘗據經典以論是非歷侍御史轉樂浪太守至遼公孫度欲招之茂終不屈還拜魏郡太守遷尚書僕射

晉

張華

范陽人都督幽州軍事撫納三韓諸國依山帶海四千餘里向未歸附者咸來朝獻

慕容廆

棘城人建武初遣使勸進元帝拜廆監平州諸軍事安北將軍進封遼東郡公食邑萬戶

隋

麥鐵杖



金史通志 卷之第二十四  
煬帝征高麗至遼水敵阻水拒守時麥鐵杖  
為左屯衛將軍謂人曰丈夫性命自有在豈  
能臥死兒女子之手乎請  
為前鋒奮躍登岸力戰死

### 沈光

吳興人從煬帝攻遼東以衝梯擊城竿長十  
五丈光升其端臨城殺傷十數人賊競擊而  
墜未及地適遇竿有垂絙光接而復上帝望  
見壯之召與語拜朝散大夫後殉江都之難

## 唐

### 張儉

新豐人以功累遷營州都督高麗不順儉率  
兵破之性謹畏典羽林兵三十年未嘗有過  
卒贈荊  
州都督

### 李道宗

太宗征高麗時張儉為營州都督先遣度遼  
窺形勢道宗請一百騎秣馬東兵深入相度  
險易將還會高麗兵斷其後走間道  
謁太宗太宗曰貴育之勇何以過此

### 程名振

以營州都督征高麗高麗見其兵少開門逆  
戰名振奮擊大破之焚其外郭及村落而還

### 李世勣

太宗征高麗勣以遼東道行軍大  
總管拔蓋牟城進攻遼東克之

### 劉仁軌

尉氏人少貧賤好學以博通聞後因破百濟  
詔統兵領之乃復戶版署官吏開道路賑貧  
乏民皆  
安所

### 高侃

永徽中為北遷安撫使以功歷安東都護

### 薛萬徹

以右武衛大將軍為青丘道行軍大總管自海道入征高麗度鴨綠次泊灼城破其兵三萬乃還

### 薛仁貴

龍門人少貧賤太宗征遼求猛將仁貴應募會郎將劉君印被圍仁貴馳救斬敵將首繫馬鞍由是知名王師攻安市高麗率兵二十萬拒戰仁貴欲立奇功乃着白衣持戟呼突所向披靡帝嘗試其射一發洞貫五甲嘗破敵十餘萬發三矢輒殺三人軍人歌曰將軍三箭定天山威振遼海詔率兵二萬鎮平壤拜安東都護

### 蘇定方

武邑人以中郎將出為神丘道大總管率師討百濟兵入其郛王義慈及太子隆等北走定方登城建唐幟百濟平拜遼東大總管破高麗于湏江後贈大將軍

### 蔣儼

義興人擢明經為右屯衛參軍太宗將伐高麗募為使者人皆憚往儼曰天子雄武無不畏威蕞爾小國敢圖王人如有不幸固吾死所也遂請行為莫離支所囚以兵脅之不屈納室中高麗平乃歸帝奇其節

### 長孫無忌

從太宗征高麗攻安市城敵兵十五萬無忌以萬人衝其後撤橋梁斷敵歸路敵眾遂降

### 張亮

平壤道行軍大總管襲沙卑城拔之耀兵於鴨綠水

### 契苾何力

以遼東道行軍總管擊高麗敵以精兵守鴨綠軍不得渡忽值冰合何力引眾乘冰鼓譟而進敵大潰追奔數十里斬首三萬餘級餘眾悉降

### 遼

### 劉伸

宛平人重熙年進士歷彰武軍節度使掌書記擢承旨徙南京副留守俄改崇義軍節度使政務簡靜民用不擾致烏鵲同巢之異道宗嘗謂大臣曰今之忠直耶律玦劉伸而已拜參知政事加太子太保遷上京留守

### 韓應凝

保寧中遷護軍司徒開泰中累遷護衛太保以崇義軍節度使移鎮廣德秩滿部民請留從之尋遷大同軍節度使卒於官

### 王棠

新城人博古善屬文重熙十五年擢進士鄉貢禮部廷試皆第一累遷上京鹽鐵使太康二年遼饑民多死乞請賑恤從之棠練達朝政臨事不怠修明法度為時名臣

### 蕭孝穆

東京留守治遼陽為政寬簡撫納流徙其民安之

### 蕭蒲奴

字留隱幼孤貧傭於醫家牧牛醫者嘗見蒲奴熟寐有蛇透身異之教以讀書聰敏嗜學涉獵經史習騎射既冠意氣豪邁開泰間選克護衛後為都監有功兼侍中

### 蕭阿刺

字阿里懶孝穆之子也累遷同知北院樞密使西北路招討使封西北郡王駙馬都尉進王韓明年改北院樞密使徙王陳與蕭革同掌國政革諂諛不法阿刺爭之不得告歸上由此惡之除東京留守

### 蕭韓家奴

少好學弱冠入南山讀書博覽經史通遼漢文統和十四年始仕歷官天成軍節度使屢有獻納後拜歸德軍節度使以善治聞帝嘗遣使問勞有六義集行世

### 蕭兀納

貌魁偉善騎射累官北府宰相以直言忤天祚出為興遼軍節度使尋改臨海軍節度使後與蕭敵里拒金兵於長濼以軍敗免官五年授上京副元帥卒年七十

### 耶律蒲古

以武勇稱為涿州刺史從伐高麗有功開泰末為上京客省副使在鎮有治蹟太平五年改廣德軍節度使尋遷東京統軍使蒞政嚴明諸部懾服

## 金

### 李晏

高平人為遼陽府推官累陞翰林學士文章政事時稱獨步

### 完顏阿里不孫

明昌進士屢官御史中丞參知遼東行省事為人寬厚敏於吏事能制治劇要後為伯德胡土所害識者以為未盡其用云

### 幹魯

康宗初高麗築九城於曷懶甸魯對築九城與高麗拒出戰入守卒城高麗後封鄭國王

劉煥

中山人宋末兵起乏食煥尚幼煮糠飲其清者以醴厚供母稍長就學天寒擁糞火讀書登大德元年進士官北京警巡使眾皆畏憚及召為監察御史父老皆臥車挽鉦而留之

王維翰

大定中為永霸令縣豪欲嘗試維翰設事陳訴翰窮竟之遂伏其詐杖殺之徼訟衰息

唐括德温

上京率河人從宋王宗望收平州遇敵兵敗之太祖賞賚甚厚遷龍虎衛上將軍歷臨海軍節度使

納坦謀嘉

上京路人初為東京教授累官翰林待制以廉能稱仕至兵部侍郎同修國史

移刺福僧

大安初同知興中府事督民繕城浚濠為禦頃之兵至以有備得無患尋改廣寧復克遼東宣撫副使歲饑先賑民而後奏詔獎諭之

僕散揆

崇義軍節度使入進尚書右丞尋出經畧邊事外剛內和與物無忤臨民多惠政

紇石烈德

明昌進士為遼東路轉運使民甚愛戴後遷東京留守武勝軍節度使工部尚書

奧屯襄

上京路人襲猛安以舉通練邊事授崇義軍節度副使平南盪寇將軍以功陞河南路統軍昌武軍節度使崇慶改元為元帥左都監

楊雲翼

天資穎異初學語輒畫地作字日誦數千言登進士累官上京東京等路按察使翰林承旨張行簡薦其才術召授提點司天臺遷翰林侍講兼修國史

移刺按答

熙宗初除安州刺史累官東京留守參知政事完顏守道經畧北方攝咸平路屯軍都統騎射絕倫善相馬閱良馬於市雖羸瘦輒與善價他日視之果良

紇石烈桓端

襲謀克為宣差提控貞祐二年蒲鮮萬奴亂端獨率兵擊敗之貞祐四年遣王汝弼由海道奏事宣宗嘉其功遷遼海軍節度使累官武衛軍都指揮使行元帥府事

吾札忽

大定初除咸平尹歷呼里改節度使有才智善用軍無往不克號為鶻軍云

高昌福

宛平人登進士第歷官同知東京留守以治最遷山東西路轉運使工部尚書彰德軍節度使致仕

李完

同知廣寧府初遼濱民崔元入城飲不歸得屍於水中有司執同飲者訊之皆誣服提刑司疑其冤以獄畀完完廉得其賊乃舟師也遂免同飲者

徒單繹

上京按出虎達阿人尚熙宗女歷宣德泰安淄州刺史改同知廣寧府事歷遷棗州防禦使臨海軍節度使

烏古孫兀屯

上京路人明昌七年以本部克萬戶備邊有功累遷唐州刺史昌武軍節度使西南路招討使同知上京留守事太安三年將兵入衛上都遷元帥右都監北京留守

盧孝儉

宣德人登進士第累官太原少尹大定中遷同知廣寧歲大饑民多流亾乃設法賑濟活人甚衆

馬惠迪

西京留守判官以治最擢同知崇義軍節度使每奏事朝臣鮮有及者累遷御史中丞

高松

年十九從軍有力善戰宗弼聞其名置之左右世宗卽位克東京路渤海萬戶從征有功

遷咸平少尹崇義軍節度使

元

王居禮

以廕補大名路南樂縣主簿歷兩淮運使司丞知錦州事備經繁劇勸農興學一以清心省事爲本值歲凶發倉賑濟全活甚衆民有訟田不決者居禮開譬甚明其人相讓而退人感之樹去思碑

胡秉彝

霸州人累官錦州知州器量恢宏不事苛細先是州民不業耕織秉彝乃自編伊尹武侯耕田遺制及苗司農栽桑圖徧行都鄙復於城東築濟民園種桑百餘畦聽民移植雖蔬菜菓蔬栽植有方小民效法衣食饒足至元中省部馳檄東方和糴奉行不善秉彝令有

盛京通志 卷之第二十四  
蓄積者聽自輸官民輦運赴倉  
侵漁遂息去任民稱遺愛焉

### 王伯勝

遼陽行省平章政事歷知懿州州僻陋民不知學伯勝乃增弟子員選師教之募民耕種廩餼之歲旱齋戒禱雨禱畢即應人謂之平章雨

### 羅璧

鎮江人至元中丞相伯顏言初通海運以璧為懷遠大將軍管海道運糧乃顏叛璧以漕舟自遼陽浮海抵錦州小凌河至廣寧十寨諸軍賴以濟加昭勇大將軍

### 木華黎

封忠武王經畧遼東人皆戴之

### 廉希憲

字善甫幼魁偉舉止異常官遼東中書省平章政事治蹟著聞卒封魏國公謚文正

### 劉敏中

字端甫章丘人由中書掾擢兵部主事拜監察御史宣撫遼東嘗以法繩貴倖發廩賑災除東平路總管官至翰林學士承旨生平進退不苟匡救實多心憂時事則淚濕枕蓆有中菴集二十五卷行世卒追封齊國公

### 塔出

蒙古氏以勲臣子授昭勇大將軍改東京等路行中書右丞復授遼東道宣慰使有軍功為遼陽行省平章政事民嘗德之曰非宣慰公吾屬無遺矣

### 洪福源

為神騎都領高麗叛福源屢攻敗之後贈嘉議大夫瀋陽侯謚忠憲



耶律雷哥

契丹人為北邊千戶太祖起兵朔方遁至安韓州與耶的合兵十萬餘自號都元帥營帳百里威震遼東太祖命按陳至遼留哥率所部會按陳於金山刑牲折矢以盟後與子薛闍奉金幣銀牌見帝大悅賜金虎符仍命為遼王卒年五十六妻姚里氏入奏會帝征西域承制以姚里氏佩虎符領其眾七年

賀惟一

遼陽行省左丞相糴粟以給京師處置有法所致甚多民不見擾

王忱

性明敏有才識授山北遼東道提刑按察司副使駙馬伯忽里數馳獵蹂民田忱以法繩之憲吏耿熙言徵北京宣慰司逋負計可得鈔二十萬帝遣使覈實熙懼事露擅增制語

有並打算大小一切諸衙門等事十二字追繫官吏至數百人忱驗問知其詐熙乃輸服

荅里麻

高昌人累官刑部尚書元統初陞遼陽行省參知政事高麗使朝京過遼陽謁省官奉布其書用征東省印封之里麻詰曰印以署公牘何為奉私書乃擲還之遷陝西行臺中丞致仕

也速

蒙古人倜儻有能聲拜中書平章政事淮南賊陷大寧詔也速討之遂拔大寧進階金紫光祿大夫知樞密院事既而雷帖木兒不花程思忠等陷永平詔也速出師遂復灤州遷安賊竊入永平增土築城因河為塹堅守不下也速擒雷帖木兒不花送南京程思忠棄城遁去追至瑞州殺獲萬計詔還京師拜遼陽行省左丞相知樞密院事

王結

定興人性聰敏讀書數行俱下終身不怠憲副王仁見之曰公輔器也遷侍讀學士大定中轉遼陽行省參政歲大水穀價騰貴結請發粟萬石賑之

尉遲德誠

絳州人拜遼東道肅政廉訪使上疏言勞諸王以懷其心防出入以嚴宮禁及立諫官崇科舉置常平懲奢侈禁鈔法汰冗員等論皆中時宜

唐仁祖

畏兀人授翰林學士承旨遼陽饑奉旨往賑同事者欲如戶口大小給之仁祖不可曰昔籍小口今已長矣皆以大口給之民賴活者無數卒謚文

來阿八赤

寧夏人累官同僉宣徽院事遼左不寧降虎符授征東招討使入赤招徠降附遠近貼然

洪俊奇

福源第二子管領歸附高麗軍民總管高麗權臣林衍叛奇討平之歷遼陽尚書省右丞

洪君祥

福源第五子遼陽行省右丞請於朝宜新省治增巡兵設儒學提舉官都鎮撫等員以興文化修武備武宗即位徵為同知樞密院事歷遼陽行省平章政事

明

王翺

鹽山人乙未進士正統七年提督遼東軍務三軍無不用命經畧屯堡簡閱行伍更老弱賑貧窮婚配鰥寡寬法律凡詢訟量情以布粟贖罪軍民便焉

程信

休寧人壬戌進士歷陞遼東左參政以倉官盜糧事能平反以憂去後又陞僉都御史巡撫遼東造戰車翔義倉時芻粟稽侵漁察奸細號令一新尋陞刑部侍郎南京兵部尚書致仕

滕昭

汝陽人氣岸魁偉文學該博成化初巡撫遼東經畧要害申飭將卒完城郭繕甲兵加意學校推誠待物廣詢民瘼痛革奸貪以故還朝之日攀留遮道無不洒涕

馬文升

河南人景泰辛未進士授監察御史以諸練戎務三陞遼東皆樹偉績

周斯盛

西寧人癸丑進士嘉靖時巡按遼東是年夏霪雨數月禾盡湮沒所在城堡傾倒軍民饑甚亟開倉賑給不足復索之庫得贖金併可貸者萬餘兩分命官屬訪素有積貯者量其所蓄予之金俾出穀平糴與民猶不足上疏求賑言甚切至特差御史運米發帑金救恤軍民全活甚眾論者謂是時非斯盛竭心盡力曲處詳慮地方幾弗靖有安定之功焉

強珍

滄州人丙戌進士授監察御史巡按遼東精敏果毅敢於搏擊豪右邊境大安太監汪直監督遼東軍事贖貨殺人珍論劾之直反誣珍檻車詔獄許襄毅公進為御史疏其冤除籍戍鐵嶺直敗復珍官累遷南京通政

王嵩

汲縣人乙未進士成化間巡按遼東舉行朱文公冠婚喪祭禮痛革佛事遂至成俗云

李善

隴州人成化年進士授行人拜監察御史按遼東時總兵官羅雄武備廢弛太監韋朗侵漁兵餉縱舍人奪人妻孥聞善至遂屏息論劾都督王鍇孫貴罷去威震遼東豪右斂跡

羅綺

磁州人庚戌進士授監察御史巡按遼東沉謀多識風紀振肅累陞戶部侍郎

劉大謨

儀封人由進士歷監察御史巡按遼東嚴明端正剔蠹除奸時鎮守太監貪殘無厭大謨收其左右痛繩以法乃賂近侍誣奏他事逮詔獄遼士民奔走哭泣自遼陽抵山海遮道不絕謫隆德典史尋歷遷都察院右僉都御史巡撫山西所在政蹟著聞

劉成德

蒲州人辛未進士拜監察御史按遼東修舉廢墜奏開儒學貢置雅樂射禮塑兩廡賢像親書聖賢牌位重修學宮建察院其政蹟甚著一時

張文明

陽曲人辛未進士正德時巡按遼東政尚大體寬恤小民自鎮副等官以下皆疏其弊以劾之時有內宦恃權故縱文明繩其左右吏畏其威民懷其惠

曾銑

江都人嘉靖己丑進士拜監察御史巡按遼東乙未春巡撫都御史呂經北巡至自開原如遼陽行政過激拂士卒心三月己丑據城叛時銑按部至復州聞變亟旋四月丙申入城開諭禍福以安輯之經歸叛卒門焉銑乃扶數人以徇啓門出是月丙申廣寧兵變又撫順軍縛備禦劫其家銑各出檄陽示撫安陰圖渠魁上狀請以計滅七月甲子銑行射

禮文武畢至忽出袖中姓名首亂者死脅從  
罔治分令官卒授以意逾時縛八人至明日  
撫順擒七人陰使人計殺廣寧賊首擒十二  
人不假兵革三城肅清遼人建祠祀之有記

### 許進

靈寶人丙辰進士授監察御史分巡遼東威  
名震攝中貴屏息尋擢都察院右僉都御史  
巡撫大同以一身係天下安危善  
類賴之卒贈太子太保謚襄毅

### 許達

固始人正德三年進士長身巨口猿臂燕頤  
沉靜有謀畧以樂陵知縣平流賊功超陞山  
東按察司僉事分巡遼海東寧道禮賢愛民  
聽獄詳明尋陞江西按察司副使因逆濠之  
變達不屈死之贈  
禮部尚書謚忠烈

### 王宗彝

東鹿人丙戌進士官戶部郎督理遼東糧儲  
屯種盡心緯畫勘斛斗慎出納召糴關中悉  
有程算官民兩便府藏克實歷陞都察  
院僉都御史巡撫遼東官至戶部尚書

### 王懋中

安福人舉進士刑部郎中擢山東布政司參  
政分守遼海東寧道沉毅強學練事勤政聽  
斷明允東  
人安焉

### 王舜漁

常熟人由進士授工部主事歷官山東按察  
司僉事明敏公勤敢於任怨興利除弊不遺  
餘力先時正德間國計告匱遼東軍職俸食  
不得時給射利者於中行賂網利舜漁廉得  
之即發其奸  
遼人頌之

### 葉旺

六安人洪武間以雄武衛指揮同馬雲鎮守遼東有軍功陞後軍都督仍鎮遼東

### 馬雲

合肥人勇敢有謀授龍虎將軍都指揮使與葉旺由登萊渡海屯兵金州同心協力設方畧厲士卒遠近翕然後以軍功陞中軍都督府都督仍鎮遼東

### 劉江

宿遷人姿貌豐偉知識過人永樂間官左都督鎮守遼東以金州倭寇竊發調度追擊斬獲甚多倭寇遂絕事聞褒美封廣寧伯給券世襲

### 施聚

通州人有器識由金吾右衛指揮使以功克本路參將每親率兵破敵陞都督僉事克右副總兵鎮守遼東累功陞左都督進封懷柔伯

### 曹義

儀真人少好學襲父燕山左衛指揮永樂間召從征居前鋒克著奇績尋平茶陵梅花洞蠻陞中軍都督僉事鎮守遼東開擴邊疆累功進位左軍都督加封豐潤伯食祿一千二百石給券世襲

### 巫凱

句容人幼穎異七歲賦牡丹詩人咸異之十九代父百戶職累功陞遼東都指揮使宣德間陞左軍都督僉事展擴廣寧城奏設寧遠衛尋陞都督同知

### 王真

盱眙人由大寧後衛後所千戶累功陞都指揮使管遼東都司事素著勞蹟陞左軍都督僉事後又陞都督同知疾卒遣官賜祭葬

王祥

固始人由燕山衛指揮使總神機營後陞都指揮僉事往廣寧開原操備修築寧遠蒲河等城掌遼東都司事恤下興學頗多善政

鄒溶

盱眙人由燕山左護衛百戶累陞錦州衛指揮同知調開原備禦修城壘開河道展關廂創馬市俱有能聲官至都指揮同知

周鸚

懷遠人以功陞西安衛都指揮僉事後調安遼右衛馬雲葉旺聞其勇遂致之幕下凡有攻伐必委任之屢有勞績及卒賜祭於其家

皇清

盛京通志卷之第二十五

人物

漢祖功臣多由豐沛光武佐命半起南陽神聖作而名世應期天之生才良非偶也遼左漢唐以來犖犖者可指數

興朝肇祉天潢貴戚皆周召畢散之英而翼贊折衝攀鱗附翼起者濟濟焉豈長白巫閭蜿螭磅礪積久而昌歟抑天秘其精奇儲以相授歟

聖天子保泰承乾明良喜起人才之盛更非竹帛可勝紀矣作人物志

漢

公孫度

遼東襄平人初為元菟吏後舉有道累官遼東太守東伐高麗西擊烏桓南越海取東萊諸縣威行海外曹操表為永康鄉侯度曰我王遼東何永康耶藏印綬於武庫子康嗣魏封為襄平侯

李敏

襄平人初為河內太守去官還鄉里公孫度欲強起之敏乘舟浮海莫知所終子信載孝義亂即其孫也

魏

公孫恭

度之弟為遼東太守魏文帝拜為車騎將軍尋封為平郭侯

晉

李胤

襄平人幼孤有識父信早喪以祖敏浮海不知所終設木主事之以孝聞容貌質素頽然若不足者參北軍事政尚清簡入為吏部尚書賜爵關中侯泰始初拜侍中加特進俄遷尚書令家貧病無以藥帝聞賜錢十萬太康中薨謚曰成

南北朝

安同

遼東人祖世高漢時以安息王侍子入洛歷魏至晉避亂遼東家焉魏道武徵兵於慕容垂同從征有功賜爵北新侯又詔持節循察并定二州郡國肅然魏太武監國以同為左



在東通志  
卷之五十一  
輔及即位進  
爵高陽公

### 安原

同之子性沉勇多智畧明元時鎮雲中以功賜爵武原侯太武即位拜駕部尚書進爵河間公

### 安頡

原之弟辨慧多畧初為內侍長宜城王奚斤追赫連昌至安定頡為監軍侍御史昌來攻頡擒昌送京師賜爵西平公後以功進爵為王卒謚曰襄頡為將善綏士卒及卒宋軍降者無不嘆息

### 任祥

廣寧人少和厚有器度初從葛榮榮署為王榮敗後隨齊神武起兵歷尚書僕射開府封

魏郡公

### 李元護

亂八世孫少有武力博覽文史魏平齊隨父懷慶南奔景明初為齊州刺史封廣饒伯

### 潘樂

廣寧人生時有雀止其母肩占者以為富貴徵及長寬厚有志畧為爾朱榮別將以有功封敷城縣男進爵廣宗縣伯累以軍功拜東雍州刺史封金門郡公

### 高謙之

遼東人少事後母以孝聞精於文藝為河陰縣令有囊瓦礫詐市人馬者逸去謙之偽枷一囚於市宣言是詐馬者遣腹心察之有一人以無復後憂為幸遂執之悉獲其黨修涼書十卷行於世

高恭之

謙之弟少聰敏除洛陽令為政清謹剛斷正光中為御史糾相州刺史李世哲後世哲弟神軌為靈太后寵任收恭之於獄尋賜死士人哀之有文集行世贈雍州刺史

隋

李衍

襄平人父弼為周太師衍少專武藝慷慨有志畧仕隋以行軍總管討叛蠻進位柱國

唐

李澄

襄平人蒲山公寬遠胄勇悍隸江淮都統李垣府又從永平節度李勉軍勉帥汴表澄滑州刺史興元中澄遣盧融間道奉表詣行在德宗嘉之署帛詔納蠟丸授澄刑部尚書汴

遼

耶律倍

滑節度使澄未即宣乃先勒訓士馬李希烈疑以養子六百戍之賊攻寧陵養子輩乘機剽掠澄盡斬之封武威郡王貞元初遷檢校尚書左僕射義成軍節度使

太祖長子東丹王居遼東好學博覽外寬內恕太祖問事天敬神孰先眾弗對倍荅曰孔子萬世所尊太祖悅命立孔子廟太祖薨以位讓弟德光景宗追謚為文獻欽義讓皇帝其後子孫繁衍焉倍初市書萬卷藏於醫巫間山望海堂通陰陽音律岐黃之術善畫人物譯陰符經皆入宋秘府

耶律良

生於乾州讀書醫巫間山學問既博將入南山肄業友人止之曰爾無僕御馳驅千里縱

聞見過人年亦衰暮今卽在此已有餘地良  
曰窮通命也非爾所知不聽後補遷起居注  
進秩遷知制誥兼知部署司事奏請編御制  
詩文目曰清寧集以功遷南院樞密使出知  
中京留守卒追封  
遼西郡王謚忠誠

### 高模翰

渤海人有膂力善騎射好譚兵畧初太祖平  
渤海模翰避地高麗高麗妻以女因罪亾歸  
後晉叛盟模翰爲統軍副使下關南城邑數  
十與趙延壽同行忽有光自模翰目中出縈  
繞旗矛醖醖如流星模翰曰此天贊之祥也  
遂進兵殺獲甚衆後復屢勝詔加特進太師  
封開國公

### 耶律孟簡

字復易六歲賦曉天星月詩爲六院部太保  
處事不拘文法時多笑其迂孟簡聞之曰上  
古之時無簿書法令而天下治蓋簿書法令  
適足以滋奸倖非聖人致治之本改高州觀  
察使修學校招生徒  
歷昭德軍節度使

### 耶律鐸魯幹

知南京留守事被召以部民懇留賜詔褒獎  
歷南府宰相致仕子晉古爲烏古部節度使  
遣人來迎旣至見積委甚富曰辭親入仕當  
以裕國安民爲事枉道欺君以苟貨利非吾  
志也命  
駕而歸

### 姚景行

典中人重熙中進士性淳厚廉直累官翰林  
學士參知政事太康初以上京多滯獄命爲  
留守不數月獄空卒追  
封柳城郡王謚文憲

### 太康父

渤海人開泰間累官南府宰相出知黃龍府善於撫綏東部悅服

### 夏行美

渤海人太平中大延琳叛時行美總渤海軍於保州延琳使人來誘行美執之堅城自守以功累遷副部署致仕

### 馬人望

廣寧人性穎悟幼孤及長以才學稱咸雍中以進士為松山縣令有善政擢南京三司度支判官公私兼裕尋擢樞密都承旨遷中原度支使始至府廩皆空視事半歲積粟十五萬斛錢二十萬緡累遷樞密直學士拜參知政事人不敢干以私

### 太公鼎

遼陽人幼莊愿好學登咸熙中進士調瀋州觀察判官時遼東滌雨傷禾稼大發瀕河丁壯修隄防鼎曰潦漲南寧大典工役非利國使民之道上疏乞罷後為東鄉令省徭役務農桑建孔子廟民咸化之遷大理卿多所平反授南京副留守時盜殺留守蕭保先因而倡亂鼎單騎行郡陳以禍福眾皆聽命安輯如故

### 張琳

瀋州人幼有大志壽隆末為秘書天祚即位遷戶部尋擢南府宰相及中京陷天祚幸雲中留琳與李處溫佐魏國王淳守南京處溫父子欲立淳為帝琳不可處溫曰今日之事乃天與也淳既稱帝諸將咸居權要琳不與政遂鬱悒而卒

### 金

### 婁室

完顏部人太祖攻遼婁室襲遼主於余睹谷獲之賜鐵券取西京又屢敗宋師贈金源郡

王配享  
廟庭

### 銀朮可

宗室子太祖伐遼自銀朮可發之戰於達魯古城遼兵二十餘萬銀朮可率眾陷其中堅凡九陷陣輒戰而出又屢敗宋師歷中書令封蜀王贈金源郡王配享太宗廟庭謚武襄

### 阿離合滿

景祖第八子為人聰敏辨給凡一聞見終身不怠始金未有文字祖宗族屬時事並能默記見人舊未嘗識聞其祖父名即能道其部族世次積年舊事人或遺忘輒一一辨析言之太祖即位以耕具九為獻祝曰使陛下毋忘稼穡之艱難後封隋國王配享太祖廟庭

### 夾谷吾里補暗

土渾河人累破遼兵伐宋敗張浚軍官本部節度使封芮國公多智畧膂力過人年一百

五歲

### 拈割幹特刺

蓋州人貞元初宗毅言宋人欲起兵釁求見世宗遣幹特刺詰之無狀還報稱旨授左司員外郎累官刑部尚書世宗嘗曰擇材最難如幹特刺所舉者頗稱朕意委提控代州阜通監進尚書右丞兼樞密副使明年改上京留守還拜平章政事封芮國公

### 張浩

遼陽人博通經史尤長於詩以策謁太祖即命承應御前文字官至太師尚書令有言罷科舉者上曰自古帝王有不用文字者乎浩對曰秦始皇上顧左右曰豈可使朕為秦始皇事遂寢浩好賢樂善所著有華表山人集五子皆貴顯浩封南陽郡王

### 宗道

上京人知京兆府事時夏旱取太白湫水於遠郊及城而雨是歲大稔人以爲精意所感知河中府有惠政民立像於層觀以時祭之

### 完顏勗

字勉道穆宗第五子好學問人呼爲秀才宗翰宗望定汴州太宗使勗勞軍宗翰等問其所欲曰惟好書耳載數車而還撰本國郡望姓氏譜及他文甚衆封金源郡王

### 宗賢

本名阿魯爲歸德軍節度使政寬簡境內大治秩滿士民數千詣朝廷請留及改武定軍百姓扶老攜幼送數十里悲號而去改永定軍官吏士民持盆水與鏡前拜言曰使君廉明清直類此封景國公致仕起婆速路兵馬都總管

### 宗憲

本名阿懶年十六選入學從宗翰伐宋汴京破人爭趨府庫取財物宗憲獨載圖書以歸朝廷議制度禮樂往往仍遼舊宗憲曰方今奄有遼宋當遠引前古因時制宜成一代之法何乃取遼人制度哉歷右丞相

### 大臭

本名撻不野遼陽人從伐宋有大功封太傅漢國王

### 宗雄

康宗長子九歲射兔旣長善談辨多智畧孝敬謙謹人愛敬之嘗逐兔撻懶亦從後射之已發矢撻懶大呼曰矢及矣宗雄反顧以手接其矢就射兔中之輕健如此從太祖破遼屢有功取西京卒封楚王謚威敏配享廟庭

### 完顏希尹

從太祖征伐屢有功金初無文字希尹因契  
丹字制度依倣漢人楷字合本國語製金國  
字天輔三年字書成太祖大悅命頒行之後  
熙宗亦製金國字與希尹所製俱行希尹所  
撰謂金國大字熙宗所撰謂小字  
歷左丞相兼侍中進封金源郡王

### 完顏守貞

參知政事世宗新政頗銳政事問漢宣帝綜  
核名實之道行之何始守貞曰在陛下勵精  
無倦耳金有國七十年禮樂刑政因遼宋舊  
制雜亂無貫章宗卽位更定修正爲一代法  
儀式條約多守貞裁訂故明昌之治號稱清  
明又喜推轂善類朝廷正人多出入門下守  
貞剛直明亮凡朝廷論議及上有  
所問皆傳經以對天下推重之

### 宗翰

本名粘沒喝伐宋入汴有功封晉國  
王後贈秦王謚桓忠配享太祖廟庭

### 宗望

本名幹離不太祖第二子每從征伐皆在左  
右旣破遼上問羣臣曰徙諸部人當出何路  
宗望對曰中京殘敝芻糧不給上京爲宜然  
新降之人遠爾騷動未降者必皆疑懼勞師  
害人所失多矣上乃下其議度宜行之伐宋  
入汴有功追贈太師封宋王謚桓肅配享太  
宗廟庭

### 虞仲文

寧遠人七歲作詩日記千言由進士累任州  
縣以廉能稱舉賢良方正對策優等宰相薦  
文行第一歷翰林侍講學  
士謚文正贈特進濮國公

### 宗弼

本名兀朮太祖第四子屢伐宋有功嘗流矢  
中目怒拔去其矢血淋漓以土塞創躍馬奮

呼轉戰遂解圍歷太師都元帥領行臺尚書省事謚忠烈配享太宗廟庭

### 完顏弼

蓋州人克護衛戍邊有功除同知德州防禦使入為武衛軍副都指揮使至寧元年東京不守弼為左監軍捍禦遼東尋改知東平府山東西路宣撫副使時有亂黨張汝楫弼計殺之招降甚眾封密國公弼生平喜讀書延儒士有古良將之風

### 張九思

錦州人初補行臺省國書譯使三遷亳州防禦使副劉仲延受宋國歲貢於泗州往歲受貢以幣物不精責使者私饋不貲竟以為例九思獨不肯受仲延從之私饋遂絕歷任工部侍郎轉御史中丞遷工部尚書所守終身清約

### 高衍

遼陽人敏而好學自少能作賦登進士調補瀋陰丞世宗時為吏部尚書銓事修理選人便焉

### 幹勒忠

蓋州人歷兵部樞密院尚書省令史轉大理能執法練達邊事嘗奉使北歸致馬四千餘匹詔褒之為監察御史轉尚書省都事章宗立遷尚書兵部員外郎出為滄州刺史授北京副留守入同僉樞密院事承安二年拜武寧軍節度使性敦慤通法律以直自守不交權貴時譽歸之

### 鄧儼

懿州人由進士歷戶部尚書明事機有心力後出知歸德府致仕

### 梁肅



廣寧人勤於文墨為彰德節度世宗怒宋使就驛中取國書選朝臣孰堪為詳問使不辱君命者宰臣以肅對使還稱旨拜參知政事

### 李獻可

遼東人父石遼末狀元官至太師封金源郡王獻可大定間舉進士官至山東東西路提刑使贈特進道國公

### 高楨

遼陽人少好學雖甚暑未嘗解帶對妻孥如賓友以尚書左僕射判廣寧尹加太子太傅在鎮八年政令肅清吏畏民懷入為御史大夫以剛明自任官至太子太師

### 李英

遼陽人由進士調通遠令歷監察御史乃上書高琪曰中都之有居庸猶秦之崤函蜀之

劍閣也邇者撤居庸兵我勢孤矣琪奏其書即允宣差都提控居庸等關隘悉隸焉夜與壯士李雄四百人緣西山至佛岩寺招募軍民萬餘人召還遷翰林待制因獻十策頗施

### 高竑

渤海人以廕補官調貴德縣尉累遷安州刺史知河南府克安撫使同知大名府所至有政績後為河北西路按察轉運使

### 完顏閻山

蓋州人明昌初進士累官沁南節度使入為工部尚書後知鳳翔平涼府有聲召為吏部尚書

### 高德基

渤海人皇統二年進士為尚書省令史海陵為相剛復自用德基每與詳辨及纂都燕京命德基攝行臺省都事遷刑部侍郎有犯死者宰相欲從末減德基不從及奏上曰刑部議是因召諭之曰自朕即位以來與宰相爭是非者德基一人而已後改戶部尚書德基上疏乞免軍需房稅農稅鹽酒等課不報

耶律履

遼東丹王七世孫父聿魯早亡族兄德元無子以履為後方五歲臥廡下見微雲往來天際謂乳母曰此所謂臥看青天行白雲德元異之及長秀峙通悟精曆算通繪事尤善屬文初舉進士惡搜檢煩瑣去之廕補承奉班祇候擢國史院編修世宗召問朕讀貞觀政要見魏徵嘉謀忠節近何故無如徵者履曰忠嘉之士何代無之但上用與不用耳章宗為郡王喜讀左傳召質所疑履曰左氏多權詐不純尚書孟子聖賢純全之道願留意焉

王嘉納之

耶律辨材

履子家義州天資倜儻軀幹雄偉以志節自負為中京兵馬副都指揮使宣宗問軍政利弊辨材言將相多非真才遂忤權貴出為許州兵馬鈐轄

孟奎

遼陽人大定間進士調黎陽主簿改中都警巡使時完顏守貞禮接士人門有十俊奎其一也累遷曹州刺史同知中都路轉運使值早詔審錄冤獄多所平反大安初除博州防禦使凡屬縣事應赴州者不得泊於逆旅以防吏姦遷北京臨潢等路按察轉運使劾奏監軍完顏訛出虛造功狀人咸憚之

大懷貞

遼陽人皇統五年除閣門祗候累官彰國安武軍節度使縣尉獲盜一旗詰之有叛狀株連萬人懷貞請誅首亂者十八人餘俱釋嘗飯數僧一僧異常懷貞曰汝何許人對曰山西人復問曾為盜殺人否曰無有後三日詰盜果引此僧人服其明察改與中尹錦州富民蕭鶴途中殺人匿府少尹家有司不能捕懷貞計取之寘之於法改彰德軍節度使

**蒲察鄭畱**

大定中進士調高苑主簿補尚書省令史除監察御史累遷北京臨潢按察副使戶部侍郎改順義軍節度使再改利涉軍詔括馬鄭畱使百姓飼養以須御史劾之暨南伐諸路馬瘦惟隆州馬肥乃釋知慶陽夏人犯邊鄭畱擊走之改知平涼夏人復來攻鄭畱招潰卒為禦守計乃退改東京畱守致仕為人厚重寡言臨終取奏稿盡焚之

**石抹元**

懿州路人幼喪父號泣不食者累日十三居喪如成人禮嘗為擊鞠戲馬踣嘆曰生無兄弟倘不測奈何由是終身不復為此補樞密院尚書省譯史調同知恩州軍事尋遷監察御史為同知淄州軍州事改大興府判官沂王府司馬沁南軍節度副使生平寡言笑尚節儉居官自守不交權貴

**李三錫**

錦州人遼季盜攻錦州人推三錫主兵事設機應變城賴以完入金後知嚴州官至河北西路轉運使政事強明所至稱治

**裴滿亨**

遼海人大定間擢監察御史內侍梁道見甚驕橫朝士側目滿亨劾奏後遷同知大各府事先是豪猾縱肆莫能制者亨宣明約束闔境肅然改武安軍節度使歲大雪民多凍餒

捐俸賑恤又勸僚屬大姓同心濟之  
轉河東北路按察司卒贈嘉議大夫

### 劉瑋

咸平人幼警悟舉進士特賜及第累轉尚書  
省都事奏擬經畫田土世宗見其名曰劉瑋  
尚淹此乎遷戶部員外郎克宋國信問副  
使瑋父兄皆以是官使江左當時榮之

### 王政

蓋州人遼季高永昌據遼東知政材畧欲用  
之不就永昌敗渤海人爭縛以為功政獨逡  
巡引退吳王闍母聞而異之言於太祖授廬  
州渤海軍謀克及金兵畧宋滑州降留政為  
安撫使政從數騎入州釋繫囚發倉廩民大  
悅尋除同知金勝軍節度使兼掌軍資是時  
筦庫金帛山積而出納無錙銖之失吳王曰  
官從而加富何也對曰政以楊震四知自  
守安得不貧吳王笑曰前言  
戲之耳以黃金乘馬遺之

### 溫迪罕達

蓋州人性敦厚寡言笑初舉進士人多易視  
達貌上曰汝欲求官耶達曰取人以才豈以  
貌眾咸異之明昌五年遷監察御史宣宗遷  
汴以本職護衛上疏言遼東為興王之地當  
專守以繫一方之心又言宰相係天下輕  
重不宜權攝俄克陝州行樞密院參議官

### 劉仲尹

蓋州人登進士以潞州節度副使召為都水  
監丞家豪侈能折節讀書詩詞樂府俱極蘊  
藉有龍山  
集傳世

### 李經

錦州人有詩名意甚刻苦能出奇語李純甫  
見之曰真今世太白也再舉不第拂衣去後  
其鄉帥有表至士大夫識  
為經筆朝議命就倅是州

張景仁

遼西人為翰林學士承旨每國書與宋往復多出其手世宗嘗稱曰景仁真能文之士遷侍講翰林學士兼御史大夫廷論宰臣之非史臣以儒者之勇許之

王庭筠

蓋州熊岳人生未期視書識十七字七歲學詩涿郡王修一見期以國士登大定進士調恩州軍州判官臨政有聲再調館陶主簿召為應奉翰林文字遷修撰泰和元年扈從秋山應制賦詩三十餘首上甚嘉之明年卒詔有司賻錢以給喪事求平生詩文藏之秘閣

冀禹錫

利州龍山人至寧初進士歷州郡有聲歸德受兵禹錫為行院都事經畫守禦一府倚重

龐鑄

蓋州人少年登第為翰林待制博學工詩文世多傳之

高德裔

遼陽鶴野人才高學博弱冠登進士第官至西京轉運使

劉光謙

瀋州人舉進士天資明敏處事詳雅官至少司農

馬知剛

廣寧人性敏慧善屬文時輩所推仕為鳳翔府尹有詩名

高憲

遼東人衍孫天資穎悟博學強記乙科登第為博州防禦判官

蔡珪

父松年隨元帥宗弼府珪擢進士歷澄州軍  
事判官仕終濰州刺史珪既該博有補正水  
經宋齊北魏志南北史志二十卷讀金石遺  
文跋十卷留陽志十二卷文集五十五卷傳  
世於

元

石天應

典中永德人善騎射從木華黎南征為典中  
府尹臨機應變兵出如神以功遷兵馬都元  
帥

趙炳

惠州灤陽人侍世祖於潛邸恪勤不怠累  
官安西王相子仁榮官至中書平章事

劉潤

瑞州人木華黎舉為都統使軍旅之事多謀  
焉子秉忠避難邢臺為浮屠後仕為太僕

高宣

遼陽人太宗時以元帥從睿宗攻大名宣進  
曰今來弔伐願勿嗜殺人從之及城破兵不  
血刃民心悅服又從破金兵三峯山降宣者  
二千餘人以宣為都總管賜金符令世其職

高天錫

宣子事世宗潛邸甚見親幸授父官尋改燕  
京諸路總管按察司副使天錫與丞相言曰  
農桑衣食之本不務本則衣食不給教化不  
興丞相上聞遂命立司農司以天錫為中都  
北道巡行勸農使遷  
司農少卿兵部尚書

劉世英

遼東人時金元爭河朔民物空竭世英言於  
木華黎曰建國以民為本今殺掠殆盡異日

孰給轉餉收恤存亾此其時也遂授以絳州節度使

### 李守賢

義州人歸欵授錦州臨海軍節度觀察使遷河東南路兵馬都總兵知平陽府事時河中未下守賢請自北面鑿城先登城果下破趙雄兵留屯嵩汝金兵十餘萬保少室山守賢以三千人破之攻河南降其渠魁洛西遂定

### 耶律楚材

履之子身長八尺美髯宏聲博極羣書旁通天文地理曆律術數及釋老醫卜之說下筆若宿構金末為左右司員外郎太祖克燕召見處之左右每征討必命之卜謂太宗曰此人天錫我家軍國庶政悉委之後度鐵門有一角獸形如鹿馬尾作人言謂侍衛曰汝主宜早還帝問楚材對曰此瑞獸也名曰角端能為四方語好生惡殺天降符以啓陛下願

### 王克敬

承天心以全民命帝即日班師太宗將即位未定楚材曰宗社大計宜早決遂立時民多誤觸禁網國法無赦令楚材議請肆宥條便宜十八事帝悉從之攻汴楚材奏無屠民得百四十七萬人又求得孔子五十一代孫襲封衍聖公付以廟地帝嗜酒楚材屢諫不聽乃持酒器進曰麴蘖腐物鐵尚如此而况五臟帝悟賞以金帛辛丑帝疾篤奏請赦囚獄復少蘇帝崩皇后馬真氏稱制魯刺合蠻得政柄廷臣悉畏附之楚材獨否後薨有言天下貢賦半入其家者后命視之惟棊書圖畫遺文數卷而已贈太師追封廣寧王謚文正

### 王珣

大寧人元統初為浙江行省參政年五十九即請老謂人曰穴址而峻墉必危再實之木必傷其根無功德而泰富貴何以異此所著有奏議詩文行於世

盛京通志 卷之二十一  
姓耶律氏金末避難遼西更姓王遂為義州人武力絕人善騎射年三十餘遇道士曰君相甚奇他日因一青馬而貴歲餘有鬻青馬者珣買之乘以戰進退如意又得古刀於凌水有警輒鳴故所向皆建奇功賜虎符加金紫光祿大夫克兵馬都元帥

### 王榮祖

珣長子性沉厚語音如鐘勇力絕人襲崇義軍節度使入朝帝聞其勇選三力士與搏皆應手而倒以後所至有功從征高麗破十餘城降天龍諸堡賜金幣遂移鎮高麗

### 耶律希亮

楚材孫武宗時累官翰林學士承旨兼修國史類次世祖言行以進為人性至孝疾病不廢書史或中夜起坐取燭以書所著有懋軒集三十卷卒謚忠嘉

### 耶律有尚

遼東丹王十世孫祖父官東平因家焉資識絕人篤志好學受業許衡邃於性理累官國子祭酒遷至昭文館大學士前後五居國學其教法一遵衡舊海內宗之

### 王明之

蓋州人累官翰林學士卒追封太原郡公

### 崔敬

大寧惠州人至元中為刑部主事遷監察御史在朝多所建明官至參知政事卒謚忠敏

## 明

### 王麒

建州松花江人壯勇善射洪武末從平內難小河之戰矢不虛發屢陞遼東都督同知

### 陳鑑



蓋州人正統間進士賜及第官翰林學士使  
朝鮮有皇華集行於世歷官祭酒禮部侍郎  
文章學行  
一時景仰

### 顧能

定遼前衛人性剛直與人寡合由進士授戶  
部主事有清操一生不受人一錢天順間通  
州收糧盡革諸弊淮安收錢一年錢抵九年  
遂陞本部員外郎成化初天下清官四員能  
居都御史楊繼宗之次  
刻名於便殿金柱上

### 賀欽

其先定海人因戍家廣寧景泰時以易魁山  
東省試成進士授戶科給事中嘗謂人曰官  
非竊祿者可得因書鄙夫章於壁以自儆直  
言敢諫成化四年以疾歸每教人讀白鹿洞  
教條嚴為己為人之辨弘治改元大臣交薦  
授陝西左參議適母疾遂辭閉戶讀書數十

年不一至公門暇則釣游凌谿猶徜徉  
自得沒後鄉士夫為之立祠於釣臺

### 胡溪

定遼後衛人早喪父賴伯鞠育登天順進士  
官至監察御史剛正嫉邪不避權倖成化間  
陳弭災四事上嘉納之劾大學士商輅之失  
節大理卿程信之剛暴禮部尚書姚夔之驥  
貨疏再上為忌者所中謫湖廣黔陽縣  
丞後陞廣西鬱林知州卒於官祀鄉賢

### 陳壽

寧遠人其先新淦籍由進士歷陞戶科都給  
事成化末極言法王佛寺亂政歷陞都御史  
巡撫延綏累陞南京副都御史後忤逆瑾罷  
官至南京刑部尚書致仕年八十四乃卒

### 潘輔

廣寧人癸丑進士授順天永清縣尹有冰蘖  
聲時盜賊竊發境上緝捕有方畏威遠遁卒

於官人  
咸惜之

### 孫磐

定遼右衛人性剛方有氣節弘治丙辰進士  
初試政即上疏乞考察兩京科道官陞吏部  
主事上罷各鎮中官監軍疏時逆瑾專政深  
嫉之遂免官尋起陞河南按察司僉事值流  
賊猖獗撫臣知磐嫻於兵畧令給軍餉鎧仗  
以至保障留都遏賊東殄磐之籌畫居多

### 王春

其先撫寧人曾祖信從成祖有功授羽林前  
衛指揮徙居京師後謫居遼東廣寧左屯衛  
春登丙辰進士授翰林院檢討陞周府長史  
天性純孝遇事有定識時宗室以巡撫勾稽  
廩祿聚眾往謀於門後因治兵備他盜宗室  
疑之皆挾兵自衛春啓王徧諭其故且止巡  
撫兵眾乃安有  
復菴詩集行世

### 張升

定遼中衛人聰明有雋才先是遼人未入鄉  
舉升謁撫臣試命題立就辭氣滂沛撫臣大  
驚舉正統丁卯鄉薦任本學訓導後以誣謫  
當道重其學術薦萬全都司儒學訓導學宮  
舊有井不甘升疏之列甚土人呼曰張先生  
井所著有齋菴稿行於世沒則崇祀鄉賢

### 徐景嵩

定遼中衛人正德間進士尹咸寧陞戶科給  
事中居諫垣不避權貴歷河間知府山西按  
察副使剛方寡合不  
為俗容人咸惜之

### 陳宗

遼海人性穎悟初城南池蓮忽生黃花一莖  
其大如盤色甚鮮麗術者異之曰城中當出  
奇士未幾宗生四歲能書五歲善屬文號神  
童尤長於篆刻十八登進士在刑部主事尋

陞尚寶寺少卿卒年二十七舉朝惜之

### 張鉞

義州人性明敏有氣節學問博洽屬文典麗弱冠卽以詩名景泰間領山東鄉薦在順天府通判陞山西解州知州致仕篤行古道表率鄉閭出其門者皆致通顯

### 童信

三萬衛人洪武末從成祖勇敢負氣每戰輒有奇功累官至都督

### 畢恭

前屯衛人有文武才由百戶保陞流官指揮僉事圖上方畧官至署都指揮僉事掌都司印撫士卒革奸弊廣屯田興學校政平事理人咸稱之所著有遼城吟稿

### 耿賢

定遠前衛人由指揮陞都指揮僉事掌都司印備禦金復鐵嶺尋守備寧遠隨轉右參將分守開原善撫士卒不妄交際致仕歸所屬憫其清苦各出已意餽金不貲賢悉分之軍士後卒葬城東杏林山與其師顧能墓相近時人作詩弔之併及其師以爲師弟雙清云

### 皇清

盛京通志卷之第二十六

孝義

士有百行君子每樂觀其大彼經明行修聲施  
爛然者尚已布衣韋帶之士孝友篤於家信義  
稱於里主持風教者表揚恒亟亟焉若夫委贄  
策名而疾風勁草蹈義如歸較之雍容盛平服  
休服采者其幸不幸固殊要其至性未可盡同  
日語矣遼海孝義漢唐以前因地遠史或未詳  
簡冊可稽輿論可考者率自遼金以後云作孝

義志

晉

李信

襄平人父敏河內太守去官還鄉里公孫度欲用之敏乘輕舟浮海莫知所終信浮海出塞追求積年無所見欲行喪制服則疑父尚存情若居喪而不聘娶州里以不孝莫大無後勸使娶妻既生子亂遂絕房室如居喪禮不堪其憂數年而卒

南北朝

晁清

遼東人祖暉魏濟州刺史穎川公清襲爵例降為伯為梁城戍將梁師攻圍糧盡城陷清仗節不屈為賊所殺宣武褒贈樂陵太守謚曰忠

遼

蕭酬幹

為征東副統軍東京叛敵來擊師潰獨酬幹率麾下數人力戰及於陣追贈龍虎衛上將軍

金

胡沙補撒八附

完顏部人高永昌叛胡沙補招之高永昌詐降於幹魯幹魯使胡沙補撒八往報會有言永昌非真降者幹魯進兵永昌怒殺胡沙補撒八皆支解之胡沙補神色自若罵永昌曰汝叛君逆天今日殺我明日及汝矣罵不絕口至死天會中與撒八俱贈遙鎮節度使

特虎雅

撻懶水人攻照散城屢敗遼兵班師至遼河余睹來襲婁室已引去特虎雅獨殿婁室與

僕忽得

數騎來救雅止之曰我以一死捍敵公勿來俱斃無益遂沒於陣皇統間贈明威將軍  
宗室子從破黃龍府有功天會五年同酬幹往鼂古河為實里古達等所殺投尸水中太祖遣使弔賻天眷中贈昭義大將軍

酬幹

亦宗室子從太祖伐遼屢獲戰功與僕忽得同被害後贈奉國上將軍

粘割韓奴

以護衛從宗弼征伐耶律大石稱王於北方詔加韓奴武義將軍奉使既入其境大石方適野問韓奴何人敢不下馬韓奴曰我上國使也奉天子命招汝降汝當下馬聽詔大石怒使人捽下使跪韓奴罵曰反賊天子不忍於爾加兵爾縱不能面縛請罪亦當敬天子

使乃敢加辱乎大石怒殺之世宗嘉其節贈昭毅大將軍

温迪罕蒲睹

為兀者羣牧契丹撒八等反諸羣牧皆應之蒲睹聞亂選家奴材勇數十人給以兵仗為之備賊不得發乃給諸奴曰官閱兵器願借仗應閱奴借與之明旦賊至蒲睹無以禦之被執曰吾家世受國厚恩不能從汝反也賊怒斮而殺之子孫皆遇害

鶴壽

鄆王昂子老和尚率眾招鶴壽俱反鶴壽曰吾宗室子受國厚恩寧殺我不能與賊俱反遂與二子皆被殺

納蘭綽赤

咸平路伊改河猛安人契丹括里使人招之不從括里兵至拒括里於渡口賊月餘不得

進既而括里兵大至遂見執轡而殺之贈官兩階二子皆得用廕

### 鄯陽

宗室子為符寶祗候至寧元年紇石烈執中作亂變起倉卒鄯陽與完顏石古乃召大漢軍五百人赴難力戰沒執中既死詔以鄯陽石古乃忠孝果勇沒於王事贈宣武將軍順天軍節度副使

### 完顏石古乃

為護衛十人長與鄯陽同死難詔贈鎮國上將軍順州刺史

### 夾谷守中

咸平人本名阿土古由進士歷通遠軍節度使至寧末移彰德軍未行夏兵數萬入鞏州守中乘城備之城陷不屈夏人壯之脅載而西至平涼要以招降府人守中佯許至城下

大呼曰外兵矢盡且遁矣慎勿降夏人交刃殺之詔贈資善大夫東京留守

### 石抹元毅

本名神思咸平路人歷撫州刺史會邊將失守元毅率吏卒三十餘人出州經畫猝與敵遇州倅暨從史堅請還元毅曰我輩責任邊守遇敵而奔如百姓何縱得自安復何面目見朝廷乎眾感其忠爭為効死眾寡不敵遂遇害贈信武將軍

### 高錫

德基子貞祐初為河北東路按察轉運使元兵破城自殺城下而死

### 高守約

遼陽人由進士累官觀州刺史元兵徇地河朔郭邦獻已順從至城下呼守約曰當計全家室約弗顧再三守約厲聲曰吾不汝識也城破被執不屈死詔贈崇義軍節度使

移刺古與捏

安化軍節度使貞祐初元取密州力戰死詔贈安遠大將軍知益都府事

烏古論仲温

蓋州人貞祐初為鎮南軍節度使中都被圍以鄉兵馳救不能進還鎮元兵大至城破不屈而死贈資德大夫婆速路兵馬都總管謚忠毅歲時致祭

九任

唐括孛果速附

宗室子為武州刺史唐括孛果速為軍事判官貞祐二年元兵取九任子姪抵城下謂曰汝之家屬我已得不降且殺之九任曰當以死報國遑恤家為城破力戰死孛果速亦力戰死詔贈九任臨海軍節度使加驃騎上將軍孛果速建州刺史鎮國上將軍歲時致祭

從坦

宗室子權元帥左監軍行元帥府事守平陽元兵至城破自殺贈昌武軍節度使

温迪罕老兒

同知上京留守事蒲鮮萬奴攻上京其子鐵哥生獲老兒脅之使招餘人不從鐵哥怒亂砍而死贈龍虎衛上將軍

移刺阿里合

遼人興定間累遷霍州刺史治好義堡元兵至力戰被執使降阿里合曰吾有死無二叱使跪向闕而立於是叢矢射殺之贈龍虎衛上將軍

蒲察婁室

東北路人由進士累遷孟州防禦使將兵救鄆州轉戰而至城破死之贈資德大夫定國軍節度使謚襄勇



女奚烈資祿

咸平府人金安軍節度使救鄜州城破不屈死之贈銀青榮祿大夫東京留守

黃摑九住

臨潢人知彰德府事戰歿贈榮祿大夫南京留守

陀滿斜烈

咸平路猛安人知彰德府事貞祐四年元兵取彰德死焉

徒單航

一名張僧為安州刺史北兵大至城下謂其民曰萬一攻破汝輩無子遺矣我家兩世駙馬受國厚恩決不可降汝輩計將安出其民曰太守不屈我輩何忍降願以死守航盡出其家財以犒軍民又五日度不可支乃先縊謂其家人曰我死即撤屋焚之城破人猶力戰

曰太守既死我輩不可獨降死者甚眾

完顏陳和尚

名彛字良佐北兵入大昌原以四百騎破八千眾奏功第一授定遠大將軍平涼府判官御軍有方所過秋毫無犯每戰則先登疾若風雨諸軍倚以為重鈞州城破縱軍巷戰出自言曰我金國大將欲見白事兵士夾之以行至帳下曰我忠孝軍總領陳和尚也大昌原之勝我也衛州之勝亦我也倒回谷之勝亦我也我死亂軍中人謂我負國家今日明白死天下必有知我者時欲其降斫足脛折不為屈割口吻至耳嚙血而呼至死不絕元將義之酌以馬湏祝曰好男子他日再生當令我得之詔贈鎮南軍節度使塑像褒忠廟

烏古論黑漢

為唐鄧元帥府把軍官刺史病卒朝廷道梗帥府以黑漢權刺史行帥府事宋兵攻城急

糧盡人相食黑漢殺其愛妾啖士士爭殺其  
妻子總領趙醜兒開門納宋軍不屈見殺

### 陀滿胡士門

由策論進士為臨洮府總管城破被執使跪  
不從以刀亂砍其膝脛終不為屈遂被殺詔  
贈中京留守  
立像褒忠廟

### 木甲脫魯灰

上京人歷蔡州管內觀察使行戶工部尚書  
事元兵入陝西將兵入援至商山戰士卒潰  
被執不  
屈自殺

### 烏古孫仲端

由策論進士哀宗時為翰林學士承旨  
元兵圍汴自度事變不測從容自縊

### 烏古孫奴申

由譯史入官哀宗東遷為諫議大夫行  
省左右司郎中崔立變之明日自縊死

### 阿虎帶

由進士歷御史大夫  
崔立之變縊臺中

### 完顏珠顥

由進士戶部尚書  
與阿虎帶同殉難

### 完顏絳山

哀宗之奉御也系出始祖蔡城破哀宗自縊  
遺言使焚幽蘭軒大兵入近侍皆走絳山不  
去為兵所執兵曰衆皆散走而獨後何也曰  
吾君終於是候火滅收瘞其骨耳兵笑曰若  
狂者耶汝且不能保能瘞而君耶絳山曰人  
各事其君吾君有天下十餘年功業不終身  
死社稷忍使暴露遺骸與士卒等耶果瘞吾  
君之後寸斬不恨兵以告其帥帥曰奇男子

也許之絳山乃收餘燼瘞於汝水之旁號  
哭將赴汝水死軍士救之後不知所終

元

### 孫秀實

大寧人性剛毅喜周人急里人王仲和嘗託  
秀實貸富人鈔二千錠貧不能償棄其親迹  
去數年其親思之成疾秀實日饋薪米存問  
終不樂秀實哀之悉為代償取券還其親復  
命奴控馬賁金訪仲和使歸父子歡樂聞者  
莫不嗟美每歲冬製木棉裘數百襲衣寒者  
買地為義阡使無墓者葬  
之有司以名聞詔旌之

### 郭全

遼陽人幼喪母哀戚如成人及壯父卒居廬  
三載事繼母唐古氏盡孝唐古氏生四子皆  
幼全躬耕以奉養四子繼長各求分析全不  
能止凡田廬器物皆取其澆敝者唐古氏卒

全六十餘哀痛毀瘠  
廬墓三年詔旌其閭

### 劉廷讓

大寧人至順初遇兵亂廷讓挈家避山中  
有幼弟方乳母王氏置於懷兵急廷讓棄已子  
抱幼弟扶母疾驅  
得免事聞旌之

### 李伯温

義州人行平陽元帥府事金兵來攻李成開  
門導入伯温登堞樓謂左右曰吾兄弟仗節  
擁旄受方面之寄今不幸失利誓以死報國  
汝等宜自逃生士卒皆猶豫不忍去伯温即  
拔劍殺家屬投井中以刃植柱刺心而死金  
兵登樓伯温抱柱如生無不嗟嘆稱為烈士

### 攸哈刺拔都

渤海人金末避地大寧後降木華黎授河東  
北路兵馬都元帥鎮太原金兵大至諸將呼

拔都出降拔都曰家屬聽公等所  
俘我誓與城同存亾遂歿於陣

明

### 花雲

懷遠人守太平與陳友諒力戰被縛不屈怒罵曰賊子爾縛吾吾主必滅爾斮爾為膾也遂奮躍大呼而起縛皆絕奪守者刀連砍五六人賊怒縛雲於檣叢射之雲至死罵不絕口事聞贈侯爵子授復州衛指揮僉事本衛立祠

### 鄧佐

定遼前衛指揮使狀魁梧性剛勇提督王公翽保陞署都指揮僉事成化三年隨副總兵施英按奉集堡以五十騎為前鋒當二千餘人並力死戰右手拊指剔弦見骨知不可為引刀自刎五十人無生還者報未至遼人遙見佐眾挾弓鼓吹前導自東而回僚屬皆出

迎竟不至佐家亦聞鼓吹聲入門老少驚惶迎之不見守臣奏其事立祠旌表歲時致祭

### 趙忠

廣寧右衛指揮僉事守鎮靜堡正統間北兵圍堡急忠乘城力戰歸語其妻曰封疆之臣當死封疆若城破則吾與城俱汝母子當自裁攻益急訛言城陷妻女皆縊死攻圍兩晝夜以堡堅解去守臣上其事以全城功陞指揮同知賜金為妻女塋葬旌表其門

### 尚忠

義州人百戶劉雄部軍景泰間敵人深入城下至南窰河雄率忠逆戰被圍馬中箭死忠以已馬授雄戮力潰圍而出忠亦得脫人多稱其忠焉

### 胡珍

定遼中衛指揮僉事成化中平頂山力戰死同陣亾者五十六人事聞褒陞二級

常潤

定遼中衛指揮  
平頂山力戰死

劉璘

定遼中衛指揮  
平頂山力戰死

耿秩

前衛指揮平  
頂山力戰死

高臣

東寧衛指揮平  
頂山力戰死

康繼宗

東寧衛指揮  
力戰而死

趙昂

東寧衛指揮  
力戰而死

劉旺

子荅廝附

蘭英

三萬衛都指揮成化間與其子荅廝古城堡  
設伏援絕矢竭突陣力戰父子俱沒於陣

蓋州軍成化初調廣寧操備役於歐總兵信  
九年春隨歐追敵於小黑山敵因風縱火軍  
潰歐馬中箭死英以已馬授歐得出英遇害  
事與義州軍尚忠同一得脫一遇害若不幸  
不幸焉李御史  
有碑詞表之

劉鼎

遼陽人成化中任鴻臚寺序班幼喪生母嫡  
母姚氏撫之姚歿鼎在京邸聞訃奔喪至則

母已葬矣乃即墳所悲哀結廬負土築墳守臣上其事旌表其門

### 劉定

遼陽人父王任正千戶以疾卒定廬於墓側朝夕悲哀負土為墳所司上其事旌表之

### 吳裕

廣寧人少孤母王氏教育備至比長遊庠出貢禮部會母疾衣不解帶湯藥必嘗母卒時裕哀毀慘瘁既殯結廬墓側晨昏泣奠三年不替仕至和州判官年八十卒於家

### 李用

廣寧人生員弘治間母張氏卒既葬廬於墓側朝夕哀毀撫臣上其事旌表其門

### 邵義

鐵嶺人未婚父母皆亾義竭力殯葬廬墓三年鄉人憫其孝勸之婚親迎畢不入房室復

廬於墓三年

### 紀刺漢

廣寧人五歲喪母及長父聰病思肉湯乃割股煎湯以奉父病遂愈越六載始故廬墓二年撫臣書孝行扁於門

### 史璠

廣寧人天性和平樂聽善言母病朝夕侍立疾篤益勤苦夜不就床及卒行古喪禮倚廬中門絕酒肉遠帷簿三年不出給事中賀欽以璠篤志守禮人之所難作倚廬記以表之

### 李慶

錦州人官百戶四世百口同居慶年百餘歲鄉里重其齒德焉

### 張寶

錦州人四世同居

### 文淵

蓋州人居父母喪哀毀盡禮先後廬墓六年仕至陳州知州高陵呂柟銘其墓

### 李光祖

遼陽人父敏以學行稱正德間敏以疾卒光祖三日不食哀毀踰節比葬廬墓三年鄉里稱之

### 程鎮

廣寧人太學生母病日侍湯藥寢不解衣母病轉痢聞糞甘滑者不可治鎮嘗之果甘鎮卽悲號幾死母卒隣失火時風急勢迫鎮拊棺號天曰萬一不虞與母俱焚俄反風滅火人咸異之

### 姜節

金州人父早亾正德間母周氏病節日夕拜禱於庭因獨宿戒酒肉一日母思肉食節密剖股和羹以奉母食病愈至九十餘歲不復有恙人以爲孝感所至

### 葉洪

廣寧人九歲喪父依母度日嘉靖間母病思食肉麵餅不能辦乃傭於人推磨得麵一升又思無肉遂剖股肉奉母病卽愈

### 趙堂

廣寧人父母先後俱病甚堂割股進食病咸愈鄉黨推重

### 宮守禮

寧遠人生員性端謹好古執禮父思問病篤守禮事之衣不解帶藥必親嘗及卒哀號累

日廬墓三年有白雀來巢於廬事繼母甚孝朝夕率其妻拜問母初欲更適感其孝遂已與鄉人飲無少長咸肅然守臣上其事旌表其門

王斌

開原人母聞氏从病無方可療斌向土神廟祈祝乃割肋取肝一片煎湯以進母食之病隨愈斌亦無恙人皆異之

朱國禎

寧遠人官指揮父歿居喪盡禮力營葬事治墳塋松楸鬱然皆手植也結廬墓側朝夕哭奠如初喪制終瘠羸而死妻劉氏艾年守志撫孤成立一時孝節並稱

周顯時

蓋州人父愛幼子臨終私以三千金予之顯時廬墓三年終身篤友于之誼若弗知予金

之事者後官至總兵

線補袞

寧前左參將嘉靖間戰於小團山面中流矢而卒御史上其事立祠祀之

楊照

維藩附

前屯衛人遼東總兵官都督同知嘉靖間戰歿遣官諭祭叔維藩為中路游擊同時戰死事聞贈都督僉事

楊倫

前屯衛人副總兵崇禎間陣亡僉憲題旌祠祀

李鳴鳳

總兵守前屯衛城陷刎頸死



盛京通志 卷之第二十七  
羅文耀

前屯衛副總兵與  
李鳴鳳同殉難

王定宸

寧遠總兵在呂  
洪山力戰死

曹變蛟

大同總兵在呂  
洪山力戰死

皇清

盛京通志卷之第二十七

列女

人生戴天履地而無媿者惟扶植綱常敦修倫  
紀爲世完人而已然志節之良不獨歸於男子  
卽巾幗中未嘗無人也訪諸遼海得於父老傳  
聞與夫簡編記述其間松筠矢操冰雪爲心者  
或全婦道或著母儀或力守孤或甘從死從容  
慷慨庶幾流芳彤管媲美班香者矣爰彙錄以  
備采風作列女志

遼

邢簡妻陳氏

營州人通經義好吟詠人以女秀才名之年二十歸於簡孝舅姑閨門和睦親黨推重六子親教以經二子抱朴抱質皆以賢位宰相及卒贈魯國夫人婦道母儀始終無歉云

耶律氏

太師適魯之妹小字常哥自誓不嫁能詩文咸雍間作文以述時政上善之太康中皇太子被誣廢時兄適魯謫鎮州常哥與俱嘗布衣蔬食人問曰何自苦如此對曰皇儲無罪遭廢我輩豈可美食安寢及太子被害不勝哀痛年七十終

耶律奴妻蕭氏

小字意辛國舅駙馬都尉陶蘇幹之女二十始適奴以孝謹聞奴與樞密使乙辛有隙被誣奪爵流烏古部帝以意辛公主之女欲使絕婚意辛曰陛下天地之恩然夫婦之義死

生以之臨難頓乖綱常禽獸何異帝從之後召還子國隱仕保大中意辛謂諸子曰吾度盧彥倫必叛汝輩速避我當死之賊至遇害

耶律朮者妻葉氏

小字訛里本國舅孛堇之女年十八歸朮者及居朮者喪極哀毀既葬謂所親曰朮者早歲登朝有才不壽天禍妾身復何依恃死者可見則從不可見則當與俱侍婢慰勉無回意白刃卒

耶律中妻蕭氏

小字按蘭韓國國王惠之四世孫年二十歸中親戚皆譽其德天慶中為賊所執置刃于履誓曰汗我者即死之至夜賊遁得免中為五院都監金兵至中守節死按蘭悲戚不形于外人怪之俄躍馬突出至中所自殺

韓慶民妻

慶民宜州節度使宜州陷死節金以其妻配將士不從遂自殺金世宗讀太宗實錄見之曰如此節操可謂難矣

金

阿鄰妻沙里質

金源郡王銀朮可之妹天輔六年黃龍府叛卒攻抄旁近時阿鄰從軍沙里質糾集附近得男女五百人築柵為保守計賊千餘來攻沙里質累擅為甲以裳為旗男夫授甲婦女鼓譟自仗劍督戰三日賊去皇統二年論功封金源郡夫人

李寶信妻王氏

寶信為義豐縣令張覺以平州叛王氏陷賊中賊欲逼室之王氏罵賊賊怒支解之大定

十二年贈貞烈縣君

阿魯真

宗室承克之女夾谷胡山之妻夫凶寡居承克為上京元帥上京行省太平執承克以應蒲鮮萬奴阿魯真治廢壘修器械以自守萬奴使人招之不從乃射承克書入城阿魯真得而碎之曰此詐也萬奴兵攻之阿魯真衣男子服與其子蒲帶督眾力戰殺數百人萬奴解去獲其將一人詔封郡公夫人

獨吉氏

平章政事千家奴之子適內族撒合輦撒合輦為中京留守元兵圍之瘋發背不能軍獨吉氏謂之曰公本無功能徒以宗室故嘗在禁近今留守外路第一等官受國家恩厚大兵臨城不幸不能戰當率精銳奪門出走京師不能一戰而死猶可報國幸無以我為慮

撒合輦出巡城獨吉氏取平日衣服玩好散之家人戒女使曰我死則扶置榻上以火焚之無使兵見言訖自縊死撒合輦自外至拊榻曰夫人不辱我我肯辱朝廷乎城破投壕水死

### 蒲察氏

字明秀鄜州師諫申之女完顏長樂之妻也長樂從哀宗遷歸德一子在幼出妻柴氏所生也撫之如已出崔立之變驅從官妻子于省中人自閱之蒲察以幼子付婢僕與之金幣與家人訣曰崔立不道強人妻女吾惟一死不負耳汝等善養幼子遂自縊歎然若不難者以死為

### 烏古論氏

附義婢

陀滿胡士門之妻也土門死王事崔立之變衣冠婦女多為所汙烏古論氏謂家人曰吾

夫不辱朝廷我敢辱吾夫乎即自縊一婢從死於側

### 參政完顏素蘭妻

亾其姓氏崔立之變謂所親曰吾夫有天下重名吾豈肯隨眾陷身以辱吾夫乎今日一死固當但不可無名而死亦不可離吾家而死即自縊於室

### 温特罕氏

義婢附

夫完顏亾哥系出蕭王崔立之變亾哥義不受辱與妻訣妻曰君能為國家死我不能為君死乎一婢曰主死婢將安歸是日夫婦以一繩自縊婢從之

### 尹氏

完顏猪兒之妻也系出蕭王從哀宗為元帥戰死妻聞猪兒死取家貲焚之遂自縊

### 完顏仲德妻

不知其族氏崔立之變毀容服攜妾及二子走蔡蔡被圍丁男皆乘城拒守謂仲德曰事勢若此此丈夫能為國出力婦人不能耶率諸命婦為一軍親運矢石於城下城中婦女爭繼之城破自盡

### 寶符李氏

哀宗奉御元兵入汴從后妃北遷至宣德州摩訶院居佛殿中作幡旆即於佛像前自縊死自書門紙曰寶符御侍此處身故後人見其遺跡而哀之

元

### 姚里氏

耶律留哥之妻先是人推留哥為遼王留哥卒姚里氏攜次子善哥鐵哥永安及從子塔塔兒孫收國奴見帝於河西帝慰勞甚至姚里氏奏留哥既歿官民之主其長子薛閣扈從有年願以次子善哥代之使歸襲爵帝欲令善哥襲爵姚里氏拜且泣曰薛閣者前妻所出嫡子宜立善哥者婢子所出若立之是私已而蔑天倫也竊以為不可帝覽之允其請並給驛騎遣其季子永安送姚里氏東歸恩賚有加

### 趙氏

大寧人名哇兒年二十夫蕭病劇謂哇兒曰我死汝年少奈何哇兒曰君幸自寬脫有不諱妾不獨生遂命匠製巨棺夫沒即自經家人同棺殮葬焉其同郡又有趙臙兒妻安氏陳恭妻張氏武壽妻劉氏宋敬先妻謝氏並以死從夫事聞悉命旌表

### 王氏

遼陽人李君進妻君進卒將發引親隣咸會氏謂眾曰夫婦同穴義也因撫棺慟哭嘔血升餘而死眾殮之與夫連柩而葬送者數百人無不灑淚

明

高門五節婦

劉氏光州固始人夫高希鳳江寧人戍遼東為亂軍所掠拒而不服軍怒斷其腕而劉為所奪罵不絕口遂被殺希鳳有弟藥師奴妻李氏早寡因亂攜子姪避難始終保全後歸江寧守夫墓誓不再適希鳳季弟伯顏卜花為仇家所殺妻郭氏即自縊於馬櫪希鳳從子塿失丁為父讐訟陷而死妻金氏姑邢氏俱自縊一門五節事聞旌表迄今人艷稱之

閔氏

六安州人夫劉智才任大寧翼萬戶智才疾篤謂閔曰吾殆不起汝年少任擇所從閔泣以死誓智才卒氏年二十八無子撫妾子如已出以夫屬軍籍戍金州顛危困苦以禮自防傭紉以供衣食守臣上其事詔旌其門

白氏

遼陽丞文宗信妾宗信病篤白氏昏旦潛禱於神至忘寢食宗信語之曰汝年方二十我死汝將奈何氏應曰妾身草芥賴夫子以存活萬一不諱妾不獨生宗信死追殮氏盡出箱篋分給親戚沐浴告別主母自縊而死親戚義之與夫同葬

劉氏

名志貞建州人鎮撫劉忽魯禿女幼聰慧授孝經列女傳等書咸成誦年十六適裴貴事舅姑以孝聞貴有疾劉潛割股和糜以進弗效每夜叩天誓以身代夫疾革囑曰吾危矣汝勿善事後人氏泣曰奈何以犬豕畜妾妾當誓死安敢獨生遂自縊以明志越二日貴始卒所司上其事詔旌異之

張氏

遼陽指揮同知耿秩妻秩以戰死氏年十九  
仰天號痛即欲自盡姑與母防之嚴乃勸曰  
汝不二志節也何忍捨父母與姑乎氏遵命  
守節四十年清白無玷所司上其事旌之

籍氏

金州軍餘之妻其夫死氏年二十七欲以身  
從因親隣苦勸乃不死守志四十餘年所司  
上其事旌表其門

徐氏

金州總旗張俊妻夫死守節三十餘年所司上其事旌表其門

許氏

軍餘錢海妻夫故守節清白所司上其事旌表其門

丁氏

金州人蕭士清妾奉姑至孝士清疾氏飲食  
俱廢祝天願以身代士清歿氏悲痛累日自  
縊而死正統間旌表其門

朱氏

金州指揮張頃妻夫死氏年二十四男女無  
出痛哭曰姑所生者夫一人而已與夫同歸  
姑何託焉遂葬夫侍姑終身無玷八十有六而終所司上其事旌表其門

楊氏

名妙真浙江鄞縣人父原道戍廣寧氏年十  
八適總旗賀昇事舅姑以孝昇隨征歿於山  
海關氏奔赴扶柩歸葬子祥甫三歲氏鞠  
育成立孀居四十九年成化間旌表其門

金氏

遼陽人高原昌妻昌素疾娶未逾月病篤母  
慰氏曰善視湯藥莫辭勞苦汝年少無出自

有名門擇配氏泣曰夫死不嫁禮也何出此言原昌卒氏哭累日自縊死所司上其事旌表其門

### 張氏

遼陽人邵倫妻倫故氏年二十一哀號不絕寢食俱忘遂自縊而死與夫同葬人爭稱之

### 朱氏

義州人劉晏妻夫死寡居遇亂軍驅之行朱仆地誓死復擁上馬自墮者三以刀斷脛而死聞者咸愍其節

### 鄧氏

開原人陸淳妻淳死氏年十九哀毀不食殮畢自縊而死葬之日送之者無不為之隕涕

### 劉氏

遼陽人董欽妻夫故氏撫屍痛哭家人知有同死之志防之嚴劉給曰死者已死我當守節防少懈遂自縊

### 汪氏

廣寧人年十八歸生員侯爵爵死家甚貧賣奩以供殯葬翁姑相繼卒復經營喪葬以禮正德間旌表其門

### 曹氏

廣寧人年十八歸王清清病卒氏哀毀骨立數祈死遺腹六月生一男父母欲奪其志輒泣曰本欲以死從夫有孤兒王氏宗祀在我也倘非語再迫吾將委溝壑矣親黨憚之不復敢言子成立家業復興

### 鄭貞女



廣寧指揮雄女幼敏慧勤女工年及笄納孫  
棣聘越再期棣故女聞訃設主哭奠水漿不  
入口者三日誓不更適縞衣餽粥杜門不出  
雖至親亦罕接見舅姑遠在數百里時以女  
紅問安否慤慤如侍左右服制終父母以棣  
未奠雁欲醮之女聞而流涕輒不飲食父母  
知其志不復言年未老而容瘁  
齒落所司上其事旌表其門

### 楊氏

鐵嶺人顧澄妻澄故遺腹三月產一男氏誓  
不二適甘貧撫孤卒年七十九人咸稱之

### 程氏

陳氏宋氏陳氏附

海城人千戶李通妻生子芳甫三歲通卒氏  
甘貧守節育芳成人襲職後戍邊戰死遺妻  
陳氏年尚幼守志事姑通弟正與文亦早亾  
正妻宋氏文妻陳氏俱守節不移一門四節  
實程氏有以倡之也

### 潘氏

蓋州人生員高琰妻琰故無子潘年十九以  
紡織自養守節三十五年嘉靖間旌表其門

### 于氏

趙雲妻年二十餘雲故氏  
不二志自縊櫬旁而死

### 蘇氏

高鳳妻年二十鳳戍開原病故氏  
扶櫬歸葬撫教二子年八十三卒

### 羅氏

鳳弟龍妻年二十一龍故遺腹四月生  
一男守志撫孤成立人稱一門雙節

### 呂氏

遼陽人夫韓連家貧爲大姓傭工氏內助克  
善孝奉舅姑連有疾將死氏知不起遂先夫

自縊與同葬焉

### 臧氏

廣寧人黃福妻夫卒氏守節自誓事姑高氏以孝聞居數歲邑人欲娶之乃謀氏兄私納聘氏向姑泣曰妾本欲與夫同死以姑缺養故隱忍至此自今不得侍姑矣是夜縊死

### 甯氏

遼陽人武生馬汝隣妻夫故氏抱屍痛哭三日不食自縊而死焉

### 孫氏

廣寧人年十七適夫臧鉞夫死孫年二十九教子臧仲學舉於鄉守節二十五年而歿有司建坊表其閭有碑

### 皇清

### 趙氏

中憲大夫阿克順妻年二十七歲克順沒氏堅志自守族里賢之今年已六十五矣已經

題請奉部  
旨建坊旌表

### 滕氏

蓋平城守天成姊適王命召未及期召從征粵東後自京移家往滕抵粵甫五日召病卒乃號泣不食自縊死事聞建坊旌表

### 索伽氏

名楠珠鑲黃旗濟伯渾佐領下披甲索飛之妻年二十守節至五十歲

旨旌表

托科落氏

名阿牙兒漢鑲黃旗納蘇佐領下披甲阿里尼之妻年二十二守節至五十歲奉

旨旌表

拿拉氏

名牛紐鑲白旗韓楚漢佐領下拜牙喇阿布尼之妻年二十八守節至五十歲奉

旨旌表

覺羅氏

名胡什巴鑲黃旗發拉佐領下防禦阿克恕之妻年二十七守節至五十歲奉

旨旌表

黑舍力氏

正白旗通圖佐領下披甲雅爾孫妻孫以疾疫終氏年二十事孀姑撫幼子家貧躬紡績奉旨撫孤成立守節三十餘年康熙十九年奉

旨旌表

盛京通志卷之第二十八

隱逸

昔人賦招隱有招之使入者有招之使出者若夫明良際會必欲置其身於無用之地曰南山之南北山之北則誰與治天下哉雖然堯舜之世不乏巢許使果山靈不辱卽爲當代高蹈之流君相縱不焚林而求較之邀榮叢桂俾人譏爲捷徑者相去何等也作隱逸志

晉

公孫永

字子陽襄平人幼而好學隱於平郭不娶非身墾殖不食年九十餘操尚如一慕容暉徵之不拜歲餘詐狂暉送歸平郭苻堅亦以禮徵之因其年老道遠遣使致問未至而卒堅深悼之謚曰崇虛先生

金

高仲振

遼陽人博極羣書尤深於易及皇極經世諸書隱居嵩山足不涉城市山野小人亦知敬之嘗終日燕坐所談皆世外事有叩之者輒不復語

明

賀士諮

欽之子性通敏博極羣書陳白沙一見稱之領弘治壬子鄉薦抱道自娛不干仕進後都

御史張文錦薦其才應召陳務實學存微慎謹細微親賢遠邪等十二事即辭歸隱居不出

皇清

盛京通志卷之第二十九

流寓

士志四方生斯沒斯賢者鄙之以故出疆載質  
孔孟皆然行道不拘邦域也下此而或以仕宦  
家者或以學術游者或以佳山水卜居者又或  
時移事異遂忘其故里者遼河渤海之間類多  
遐舉流風遺韻安可泯滅譬之物類易地而增  
燉沒則已焉者人非其人耳作流寓志

漢

王仲

琅邪人好道術明天文諸呂作亂齊哀王謀發兵而數問於仲及濟北王反欲委仲為將仲懼乃浮海東奔樂浪山中因家焉

### 王烈

字彥方平原人通識達道秉義不回以陳太丘為師與邴原為友穎川荀慈明見之遂相友善英名著於海內舉孝廉三府並辟皆不就會董卓亂避地遼海躬秉農器布衣蔬食不改其樂遼人化之強不凌弱眾不暴寡市不二價丞相曹操累徵不起年七十八而終

### 邴原

字根矩北海朱虛人少與管寧俱以高尚稱黃巾起原將家屬浮海居鬱州山時孔融為北海相舉原有道不受移住遼東後欲歸鄉里至十三山聞亂未已復返遼東

### 逢萌

字子慶北海都昌人西漢末挂冠東都門將家屬浮海客於遼東萌素明陰陽知王莽將敗首戴瓦盎哭於市曰新乎新乎因遂潛藏及光武即位乃之琅邪勞山養志修道人皆化其德

### 管寧

字幼安北海朱虛人身長八尺美鬚眉少與華歆為友嘗共鋤菜見地有金寧揮鋤不顧歆捉而擲之人以是知其優劣聞公孫度令行海外遂與邴原王烈避地遼東度虛館以待既見與度語惟談經典不及世事避難者來就之旬日成邑講詩書陳俎豆飭禮讓非學者不見民化其德時所居少井男女爭汲寧乃鬻器分置井傍以待之鄉人交相誠不復爭有牛暴寧田寧置牛於涼處食之牛主大慚由是禮讓行於海表後將家屬浮海還里年八十四而卒

國淵

字子尼樂安人師事鄭康成康成稱為美才後與邴原管寧等避亂遼東淵篤學好古講學山中士人多推崇之既還魏王曹操辟為司空累遷太僕

三國

太史慈

字子義黃縣人猿臂善射茲不虛發少好學為仇家所疾避之遼東孔融聞其名因數饋問其母及融為黃巾所圍慈說劉備求援兵以解圍孫策東渡以慈為建昌都尉

晉

裴嶷

字文冀聞喜人清方有幹畧累遷中書侍郎榮陽太守後求守昌黎為慕容廆長史廆威

德益振遣嶷獻捷於朝帝留嶷以試其意嶷辭乃遣還廆謂羣僚曰裴長史名重中朝今屈於此乃天以授孤也

趙至

字景真代郡人後向遼西占戶與嵇康子蕃友善及將遠適乃與蕃書敘離別並陳其志後幽州三辟部從事見晉書文苑

高瞻

字子前渤海修人有俊才光熙中調補尚書郎永嘉之亂率數千家北居遼東

後唐

胡嶠

同州郃陽令石晉末陷遼蕭翰掌書記居復州



元

月合乃

其先本雍古部徙臨洮遷遼東居靜州之天山

明

胡世寧

浙江仁和人歷福建按察使論宸濠不法論  
戍瀋陽寄居廣寧訓誨生徒學者宗之後宸  
濠伏誅起官都御史刑部尚書

王儼

湖廣人由進士歷陞侍郎廉靜謹恪正德間  
忤劉瑾謫戍遼東僑居遼陽天王寺後恩宥  
還家

皇清

盛京通志卷之第三十

方伎

形上謂道形下為器精者為理粗者為術善器與術者方伎之說也故一曲小藝方書必載禮樂書數聖人游焉莫謂遼遠遠逐無奇能或異地而名存或生斯而業著良不可沒也作方伎志

遼

耶律敵魯

字撒不宛精於醫察形色即知病原雖不診候有十全功樞密使耶律斜軫妻有沈疴數醫不能治敵魯視之曰心有畜熱非藥石所及因其曠聒之使狂用泄其毒則可於是令

大擊鉦鼓於前翼日果狂叫怒罵力極而止遂愈治多類此官至節度使年八十卒

### 耶律乙不哥

字習撚長於卜筮不樂仕進嘗爲人擇葬地日後三日有牛乘人逐牛過者卽啓土至期果一人負乳牛引牝牛而過其人曰所謂牛乘人者此也遂啓土旣葬吉凶盡如其言又爲失鷹者占曰鷹在汝家東北三十里灤西榆上求之果得

凡志不廢方伎昔人記橐駝傳巧塤表弋說皆寓大於小之謂也遼志耶律倍素善音律岐黃之術更精於畫嘗作本國人物牛馬入宋秘府耶律楚材通曉天文如元討回回禡旗之日雨雪三尺楚材曰元冥之氣見於盛夏克敵之徵也庚辰冬大雷曰回回當滅於野後皆驗西域曆人奏五月望月蝕楚材曰否卒不蝕明年楚材言月當蝕其人曰不蝕至期果蝕倍爲遼東丹王楚材爲元大臣追封王號豈可載入方伎白仲理神丹成作金濟窮民連姓僧遇旱祈雨輒應二人已入仙釋不得再敘王珣少時有一人謂之曰君相甚奇宅日因一青馬而貴後果有以青馬鬻於珣者乘此所向有功其人姓名不傳自是而後倘有以方伎著者懸此待之可也

盛京通志卷之三十一

仙釋志

志紀物華人瑞仙釋例得並書蓋自魏書特志  
釋老史氏已爲之權輿矣夫二氏之學儒者或  
不道然其栖神寧淡存心利濟亦有足多者焉  
聞之名山大川真靈所宅遼地山川奇奧宜代  
有畸人而紀載所傳若可指屈良以俗敦真樸  
不事語怪炫奇故也存其一二以備方外一流  
云爾作仙釋志

仙

前代

丁令威

時代無考學道於太平府靈波山後化鶴來集於遼陽華表柱歌曰有鳥有鳥丁令威去家千載今始歸城郭如故人民非何

白仲理

時代無考海州人隱徐無山中相傳謂合神丹成乃於此山作金以濟竊民

明

張三丰

相傳為懿州人入武當山修煉生有異質龜形鶴骨耳大目圓鬚眉如戟頂作一髻手持方尺一笠一衲寒暑御之不修邊幅人呼為張邈邈日行千里靜則瞑目旬日所啖升斗

輒盡或辟穀數月不食明太祖遣三山高道訪於四方竟弗至太宗奇其術遣使致書遍訪名山不獲

黃花老人

天順中居蓋州城外山坡小寺有道術修煉數年一旦鶴來乘之而去其地因名伴仙山後人有詩云水色山光兩不孤乾坤窠廓自錘爐此山莫道無多景只是紅塵半點無

釋

元

雪菴

居千山香巖寺生有異質歿有舍利人敬禮之

明

行榮

遼陽人經史子集無不究覽尤深詩律編註  
大藏釋音寶鏡凡十卷廣搜遠引咸有根據  
辛勤三十  
年而始成

連姓僧

蓋平人成化間約百歲不計飢飽每與小兒  
戲於市歲旱祈雨輒應將死告人以時日後  
有人自南來遇連僧計其  
日即死之次日人咸異之

馬禪

居清風寺相貌奇古每夜環走首山  
喃喃三匝東方始白今塑其像於寺

皇清



